

ፍርቀት ዓዳት አቶብዩ ዝያረት እግል ትሰጅል አስመረ አቴት

እብ ወዚረት ደውለት እት ውዛረት ዓዳት ወስያሐት አሰይደ ብዙኔሽ መሰረት ለልትመረሐ ወዝያድ 60 አንፋር ለከምክም ልኡክ ዓዳት ፈደራልየት ዲሞቅራሲያት ጅምሁርየት አቶብዩ፡ እት ኤረትርየ ዝያረት እግል ሊዔ ማሌ ለሀ የም 16 ዲሰምበር አልዐሰር አስመረ አተ።

ለምን ውዛረት ዓዳት ወስያሐት፡ ውዛረት ካርጅየት፡ ወጠንያይ ፈን፡ ስሙያም ሰብ ወራት ፈን ለሸምል ሐሸም እብ ገበይ ክጡዋ ጀው አቶብዩ አስመረ እተ አተው እቱ ወክድ፡ መፈወድ ዓዳት ወርያደት ሰፊር ዘመዔ ተኸሌ፡ ሳብት ወኪል ኤረትርየ እት እተሓድ አፍሪቀ ሰፊር አርአየ ደስታ፡ ሰፊር ፈደራልየት ዲሞቅራሲያት ጅምሁርየት አቶብዩ እት ደውለት ኤረትርየ አሰይድ ርድዋን ሐሴን፡ ክምሰልሁመ ሙጅተመዕ ዓዳት እት መክረዩ ማእራት አስመረ ኩብቱ ናይረት ወደው እሎም።

ለሐሸም አስክ 24 ዲሰምበር እት ኤረትርየ እተ ጸንሕ እቱ፡ እብ ተለፍዝዮን ኤረትርየ ለልጠላቅ እት መዳይን ከረን፡ ባጽዕ ወአስመረ እግል ልቀድም ቱ።

ቀደም እለ አንፋር ሐሸም ወጠኒ ‘ሰብሪት’ ወስሙያም ሰብ ወራት ፈን ለሸምል ሐሸም ዓዳት ኤረትርየ፡ ምን የም 14 ፌብራይር 2019 እት አቶብዩ ዝያረት ዓዳት እግል እንቡተት ሰላም ክምሰል ወደ ልትዘከር። እተ ናይ 10 አምዕል

ዝያረት ህዩ፡ እት መዳይን አዲሱ አበባ፡ ባህርዳር፡ አዳማ ወሃዋሳ ዕፌ ሙሲቀት ቀደመ።

ኤረትርየ ወአቶብዩ እት የም 9 ጁላይ 2018 እት አስመረ ለፈረመያሁ 5 ንቃዋ ለሸምል ታሪካይ ‘ናይ ሕበር አዋጅ ሰላም ወምሰንዮት፡ እት ፍንጌ ክልኢተን ለድወል ትርድት ዕላቀት እት መጃላት ሰያሰት፡ እቅትሳድ፡ እጅትማዕየት፡ ዓዳት ወአምን መዓወነት እግል ተህሌ ለትብል ንቅጠት ትትረከብ እቱ።

እለ ክእነ እት እንቱ ምን ገጽ ምሴ መፈወድየት ዓዳት ወርያደት ኤረትርየ፡ ዲብ ሆቱል አስመረ ፓላስ ናይ ድራር ሕድርኖት ወዳት።

ዲብለ ሓክም አቅሊም ምግብ ሚጀር ጀነራል ረመዳን ዐሰማን አውልያይ፡ ሰፊር አቶብዩ ዲብ ኤረትርየ አሰይድ ርድዋን ሐሴን፡ ክምሰልሁመ ዐዘመት ለገብአት እሎም አንፋር ዓዳት ወፈን ለሐድረው እተ መናሰበት፡ መፈወድ ዓዳት ወርያደት ሰፊር ዘመዔ ተክሌ ዲብለ ቀደመየ ከሊመት፡ ፍንጌ ኤረትርየ ወአቶብዩ ለገብእ መትባዳል ዓዳት፡ ዲብ ዕፌ ሌጠ እንዔ ኢልትሐደድ፡ ፍንጌ መአሳሳት ዓዳት ክልኢተን ድወል ለህሌት ዕላቀት ለለዓቤ፡ ትሉሉይ መዋጀሃት እት ገብእ፡ ተጃርብ እግል መትባዳል ለሰዔ ምህም በራምጅ ወመናሰባት እንዔ



ትረተብ ዶል ልትከደም እቱ ክምቱ ወለማዳሊት ህዩ እኩድ ክምሰል ህለ ሸርሐ።

ወዚረት ደውለት ዲብ ውዛረት ዓዳት ወስያሐት አቶብዩ አሰይደ ብዙኔሽ መሰረት እብ ጀሀት፡ እለ ሐቆ መዳሊት ረዩም ዲብ ኤረትርየ ትገብእ ለህሌት ጀልውት ዓዳት፡ አተላላይ ናይለ ፍንጌ ኤረትርየ ወአቶብዩ ጀውላት ዓዳት እግል መትባዳል፡ ቀደም እለ እብ ፍርቀት ዓዳት ኤረትርየ ለተአንበተ በርናምጅ ክምቱ እንዔ አሸረት፡

መዋጀሀት ክልኢተን ድወል እብ መሕበራት ወእቅትሳድያይ ዝያደት እለ እንዔ ደቀብ እግል ለአተላሌ ለባተ ሰእየት ሸርሐት።

ዲብለ መናሰበት፡ መፈወድየት ዓዳት ወርያደት እግል ፍርቀት ዓዳት ሀድየት ሀበት።

ዲብ መፈወድየት ዓዳት ወርያደት መሰኡል መክተብ መመቅረሓይት ልጅነት ዓያድ አሰይድ ተሰፋይ በርሄ ወሙዲር ሃም ዓዳት ወርያደት አቅሊም ምግብ አሰይድ እንድርያስ

አስመሮም እግል ኤሪነ እትለ ሀበወ ሐብሬ፡ እለ እንቡት ለህለ መትባዳል ዓዳት ክፋል ናይለ ፍንጌ ኤረትርየ ወአቶብዩ ለትበጸሐት ናይ ሰላም ወተዳምን እትፋቅየት ክምቱ እንዔ አሸረው፡ አሀምየቱ ዲብ ዐባት ዕላቀት ክልኢተን ድወል እብ ቀሎ-ቀሎ ክምሰል ኢልትረኡ ሸርሐው።

ልኡክ ዓዳት አቶብዩ፡ ማሌ የም 17 ዲሰምበር አወላይ ዕፌሁ እት ኤረትርየ እግል ለአንቡት አስክ ከረን ጌሰ።

መንደፈሪ፡ አንፋር ሸሪኮት ብድሆ ወቅዋት ድፊዕ ልትናየቶ

አንፋር ማ/ወ/አ/አ/ኤ እት ምዴርየት መንደፈሪ፡ ዲብ ብንየት ሐዲስ ጽርግዩ ዓዲ-ኳላ - እንዳገርግሰ ሻርቲ ለህለው አንፋር ሸሪኮት ብድሆ ወአንፋር ቅዋት ድፋዕ አትናየተየ።

ለእት የም 12 ዲሰምበር ዲብ አካን እንዔ በጽሐየ ለአሸቃል ለታበዩ አዋልድ አንሳት፡ ሀደፍ ዝያረተን እግል ሸቅል ዐማር እግል ልርአየ፡ እተ ክምሰልሁመ እተ ሸቅል ፍሩራም ለህለው እግል ለአትናይተ

ክምቱ እንዔ ሸርሐዩ፡ እግል በቃዕት ለምህነት ወመትሰባል ናይለ ሸባብ ሐመደዩ።

መሰኡለት ማ/ወ/አ/አ/ኤ እቅሊም ግብለት አሰይደ ሰናይት አፈወርቂ እተ ለአስመዐቱ ህዋዩ፡ ብነ ናይለ ከዋ እግል ማሕበራይ-እቅሳድ ከደማት ሸዐብ እብ ዓመት፡ እግል አዋልድ አንሳት ህዩ እብ ፍንቱይ መንፈዓት ዐባይ ክምበ እንዔ ሸርሐት፡ አስክ ደንገበ እት

መጦር ለፍራስ ዐማር ክም ህለየ ሸርሐት።

ምን ዓዲ-ኳላ፡ እብ ዓዲ-ጥቶ እንዔ ወደ፡ አስክ እንዳ ገርግሰ ለለአድሮሬ ጽርግዩ፡ መራ እኩይ ሰበት ዐሌ፡ ወእግለ ሰካን ለዐድ ከደማት ለህይብ ሰበት ኢዐሌ፡ እለ 16 ኪሎ-ምትር ሐዲስ ጽርግዩ እግል ልትሸቂ ቀራር ክም ፈግረ ለሸርሐ እት ሸሪኮት ብድሆ መሰኡል ፕሮጀክት መራዐየት ተሸኪል አርድ አሰይድ ዑቕባይ ገብሬሚካኤል፡ አስክ እለ፡ ለለአደሚዕ ሸቅል ሸቂይ ክም ህለ አብርሀ።

እት ሸቅል ፍሩራም ለህለው ሰብ መሀነት እብ ጀሀቶም፡ እብ ሸዐብ ገብእ እግሎም ለህለ አትናያት እግል ዝያድ ክድመት ለለአትናይት፡ ወንየት ለለአወዔ ሸዐብ ክምቱ እንዔ ሐበረው፡ ሐምዴሆም ቀደመው።



ረዘቆት ሰንዱቅ አማነት ሹሀደ ልተላሌ

እት ኢጣልዩ፡ አሜርካ ወጀርመን ለነብር ኤረትርየን፡ እግል ሰዳይት ዓይላት ሹሀደ ለገብእ 35 አልፍ ወ257 ዩሮ 1900 ዶላር አሜርካ ወ30 አልፍ ነቅፈ ሰዳይት ወደው።

እብ አሳሰ ሐብሬ ውዛረት ዐመል ወራዐየት እትጅማዕየት፡ ዲብ ኢጣልዩ ጃልያት ኤረትርየን ዲብ ሚላኖ፡ ቦሎኖ፡ ፓርማ ወሸርና 21አልፍ 201 ዩሮ፡ ጃልያት ኤረትርየን ሮማ፡ ፊረንዜ፡ ናፖሊ፡ ካታንያ፡ ባሪ ወፒዛን ህዩ 10 አልፍ 756 ዩሮ፡ እተ ክምሰልሁመ ቤት ክስታን ቅዱስ ገብሪኤል እት ፖርትላንድ አረገን - አሜርካ 1,900 ዶላር አሜርካ እግል ረዘቆት ሰንዱቅ አማነት ሹሀደ ትበርዐው።

እምበል እለ፡ ጃልያት ኤረትርየን ዲብ መንጠቀት ኤስሊንገን - ጀርመን እግል 13 ዓይለት ሹሀደ መደት ክልኤ ሰነት እግል ልራዑ ለነሰአወ መባደረት አማነት እግል ለአትምም 10 ዓይለት ሹሀደ እንዔ ወሰከው 3አልፍ ወ300 ዩሮ፡ ጃልያት ኤረትርየን ሰካን ጀርመን ህዩ 13 ዓይለት ሹሀደ መደት ክልኤ ሰነት ሐቆ ረፍዐው ክም አተላላዩ 3ዓይላት እግል ልራዑ 30 አልፍ ነቅፈ ክም ትበርዐው፡ ለምን ውዛረት ዐመል ወራዐየት እጅትማዕየት ለትረከበት ሐብሬ ተአፍህም።

ዋዕላ መሕበር ሰብ ምህነት ኤሪትሮፖ ትሰርገል

ማሕበር ወጠኔ ምህንድን ዕለም አርድ ወመሆንድሲን ተዕዲን ኤሪትሮፖ፡ ዮም 14 ዲሰምበር እት አሰመረ - ቃዐት 'ኮንፌደራልየት ሽቃላ ኤሪትሮፖ' ዋዕላ ወደ።

ዲብ ውዛረት ጣቀት ወመዓድን ዳይረክተር ፈሬዕ ተዕዲን አሰይድ አለም ክብረአብ ዲበ ለአስመዐየ ህግደ፡ መደት ንዳል ዲብ አርባ ለክብር ኤሪትሮፖን ምህንድን ዕለም አርድ፡ ዲብ ማህረጃን በሎኛ እንዴ አማሕበረው ናቅሾ ወምስዳራት ነሰኦ ክም ዐለው እንዴ ሸርሐ፡ አሰሶት ለማሕበር ምንመ ተኣከራ እት መርሐለት ዶር ክምቡ ሸርሐ።

መሸተርክት፡ እት ደሰቱር ማሕበር፡ ልጅነት ቦርድ ወጌምየት እብ ፋይሕ ሓቀለ ህድገው፡ ምስል ሕፍዝ አርድ ወተዕዲን ለልትጸበ፡ ጠወርት መቅደረት



አዳም፡ ብሐሳት አርድ፡ ተእሂል ውበዕድ ክቱብ ቀርቡ።

ርኢስ ልጅነት ናይላ ዋዕላ ዶክተር ሰይፊር ብርሃኔ ምስል ኤሪት ዲበ ወደዩ ህድግ፡ ህደፍለ



ማሕበር ሐቆለ ሸርሐ፡ ለህደፍ እግል ለአውቄ ምስል ብዕዳም ሰብ ምህነት፡ መሓብር መአሰሳት ሕክመት እብ መትዓዋን ክም ልትከደም አከደ።

ምን ኩልየት ማይ-ነፍሐ ሻበት ልዋም አሰፋው እተ ሀበቱ ረኣይ፡ መትአሳሰ ወጠንያይ ማሕበር ሰብ ምህነት አርድ ወመንድሲን ተዕዲን ኤሪትሮፖ ምህም ምንማቱ፡ እግል

ዝያድ ዐውቱ፡ እብሊ ምህነት ደርሶ ለህለው መዋጥኒን አህምየት አንዴ ሀበ እግል ልክደም ትፋኔት። እት ደንጎቤ ለመሸተርክት፡ 5 አንፋር ለለ ልጅነት ሐረው።

ዲብሎማሲ ገቢል ልተላሌ

ኤሪትሮፖ፡ እት 40 ንዝም እጅትማዕ ልጅን ውዘራኦ ተንዝም ናይ ሕበር ዐዳገ ምፍጋር ጸሓይ ወግብለት አፍሪቀ፡ በህለት 'ኮሚሳ' እት ክምሰልሁመ እት መሰር ለገብኦ ዕፌ ዓዳት ሸባብ ትሻርክ እት ህሌት፡ ጃልየት ኤሪትሮፖን እት ጃብ ግብለት ሶዳን፡ 4ይ እጅትመዐ ወዴት። እት ኢጣልየ ዱብይ ወአቡዘቢ ለክብር ኤሪትሮፖን ወዲብ ኢማራት ህዩ ለትፈናተ ወጠንያይ አሸቃላት አውቀው።

እብ አሳሰ ለበጽሐተነ ሐብሬ፡ ለምን ዮም 25 አሰክ 28 ኖቨምበር እት ሉሳክ - ዛምቢየ ለገብኦ ዕልብ 40 ንዝም እጅትማዕ መጅልሰ ውዘራኦ 'ኮሚሳ' እብ ሰፊር እት ኬንያ አሰይድ በዩኔ ሮጵም ለትመረሐ ልኡክ ኤሪትሮፖ ሻረከ።

እት ዝያድ 300 ሳብታም ወካይል 21 አንፋር ድወል ኮሚሳ ወሰብ መቅደረት ለሻረከው እቱ እጅትማዕ እብ ርሐቡ እግል አትመቃረሐት በራምጅ መንጠቅት ወብጽሕ ለህለ ተጠውር ሐቆ ትጌመመ፡ ናይ 2020 በርናምጅ

ሸቅል ወመዛንየት እንዴ ፈግረ እግሉ፡ ዕልብ 25 ሰነት መትአሳሰ ለመነዝመት ዐየደው።

ሰፊር በዩኔ ሮጵም እት ለአስመዐየ ክሊመት፡ እብ መክተብ ጎማት ትጃረት ኮሚሳ ለትዳለ ናይ ክሰኦት ረኣሰ ማል መትአመሪ ክታብ ለትክተብ እግል ኤሪትሮፖ ለሸምል ጽበ፡ ምን መስሉልየት በረ ወበቃዐት ለአለቡ እት ገብኦ፡ ምን አማን ለፊመ ወ ሱረት ኤሪትሮፖ ለለኣኬ፡ ህደፍ ሰያሰት ለጽብጠ ክምቱ ለቀደመተ አትዐገቦት፡ ርኢስለ መአሰሰት እብ አፍ ወክቱብ ብሕል ጠልቡ።

እሊ ክምእነ ዲብ እንቱ፡ ምን መዳይን ሮመ፡ ሚላና፡ ቦሎኛ፡ ፓርማ፡ ቬርና፡ ቶሪና፡ ናፖሊ፡ ካታንያ፡ ባራ፡ ፒዛ፡ ፊረንሴ ፔሶካራ - ኢጣልያ ለመጸው መመቅሐት ኤሪትሮፖን መሓብር ወተናዚም፡ እት ዮም 7 ወ8 ዲሰምበር፡ እት መዲነት አልባ-አድሪያቲካ ናይ ሰር-ሰነት ጌማም አሸቃላቶም ወደው።

ሰፊር ኤሪትሮፖ ዲብ ኢጣልየ

አሰይድ ፍሰሓጽዮን ጴጥሮስ እተ ለሀበዩ ሸፊሕ፡ ሕክመት በራምጅ ብናእ ወአጥፈሐት መናበረት ሸዑብ ለህደፋ፡ አውለውየት እግል መዋጥን ኤሪትሪ ለለሀይብ ናይ ክሰኦት ረኣሰ-ማል አብካት እዱሊት ክም ህሌት እንዴ አብርሀ፡ ፋኢደቱ እንዴ ፈህመው እብ ዋጅብ እግል ልትነፍዮ እቡ ሐቆለ ትፋኑ፡ እት ሓድረት ሐለት ወጠን ወተጠውር መንጠቀትን ለረከዘ ሸፊሕ ቀደመ።

ሐቆ እሊ እብ ወጠንያይት ለጅነት፡ ጀ/ሸ/ዲ/ዐ፡ ማ/ወ/ኦ/ኦ/ኤ፡ ሸባብ ጀ/ሸ/ዲ/ዐ፡ ጃልየት፡ ለጅነት እዕላም፡ ወዲፕሎማሲ ለገብኦ ወራታት ተቅሪር ልትቀየም እት ህላ፡ መስሉል ሸኡን ሸዑብ ወጃልያት አሰይድ ግርማይ ሃብተሚካኤል፡ ናይ ለመጽእ ሰሰ አውርሐት ኤታን በራምጅ ሸቅል ለከሰሰ ተውድሕ ሀበ። እት ደንጎቤ ናይ ለመጽእ ሰታቲባት ሸቅል ለሰዱ ፊናታት ወቀራራት ሐለፈው።

እብ እንክር ብዕድ፡ ጃልያት ኤሪትሮፖን ሰነን ጃቤ፡ 'ውሕደትን ፍሬ ዐውቲን' እበ ትብል ሰቅራት እት ዮም 8 ዲሰምበር ራብዓይ መ-እተመረ ሰርገለት።

እተ ሐድ 250 ወካይል ለሻረከው እቱ መ-እተመር፡ ሰፊር ኤሪትሮፖ እት ጀምሁርየት ግብለት ሱዳን አሰይድ ዮውሃንስ ተክለሚካኤል፡ ለጃልየት እግል ክሎም ኤሪትሮፖን ለክምክም መትነዛም ወጠን ሰበት ቱ፡ ክል-መዋጥን እግል አደቀቡቱ ጅህድ እግል ሊዴ ትፋኑ።

እት ብዕድ አሸቃል ዲፕሎማሲየት ገቢል፡ አንፋር ማ/ወ/ሸ/ደ/ኤ እት መሰር፡ እት ዮም 9 ዲሰምበር እብ ኮሌጅ ሚድየ ናይ ጃምዐት አልቃህሪ ለትዳለ ዕፌ ዓዳት፡ ሻረከው።

ለምን ብዝሓት ድወል አፍሪቀ፡ ኤሰየ ወአርቢ ለመጽአው ሸባብ ለሻረከው እቱ ዕፌ ዓዳት፡ ዲብ ኤሪትሮፖ ለህለ አርዛቅ ሰያሐት፡ እግል ዓዳት ወሀውየት ኤሪትሮፖ ለሸፊሕ ሸቅል እዴ፡ ናይ ዐዋዲ ወልባሰ ቆምያት፡ እተ ክምሰልሁመ ሐልየት ዐዋዲ ወሰሰዲት ለክምክመ ዐላ።

ካትብ ሸኡን ሰፋረት ኤሪትሮፖ እት መሰር አሰይድ ዐብዱላሂ መሐመድ አድም ወመስሉል ሸኡን ዓዳት አሰይድ ሐቢብ ዐ-ሰማን፡ እተ በርናምጅ እፍትታሕ ክም ሻረከው፡

ምን አካን ለበጽሐተነ ሐብሬ አፍሀመት።

እምበል እሊ፡ ፈሬዕ ማ/ወ/ኦ/ኦ/ኤ ዲብ አቡደቢ ወዱብይ - ኢማራት፡ ዕልብ 40 ሰነት መትአሳሰ ማ/ወ/ኦ/ኦ/ኤ እብ ነያረት ዐየደዩ።

መስሉልት ማ/ወ/ኦ/ኦ/ኤ እት አቡደቢ አሰይድ ሰዲደ መሐመድ ጣህ እተ ለአስመዐተ ክሊመት፡ ኤሪትሮፖይት አንሳይት፡ እት ክሉ ወጠን ለትጠልቡ መጦር ሰናተ እንዴ ትነዝመት፡ እብ መሳዋት በቃዐተ ዶረ ለአውፊት ወለአድመዐት፡ ሐበን እግል ወጠነ ክምተ ሸርሐት።

ሰፊር ኤሪትሮፖ እት ኢማራት አሰይድ ዐ-ሰማን መሐመድ-ዐመር እብ ጀሀቱ፡ መትአሳሰ ማ/ወ/ኦ/ኦ/ኤ ኤሪትሮፖን አንሳት እት ሐንቱ ዕዛል ወጠንያይ ማሕበር እንዴ ትነዝመዩ፡ እግል ሕርየት ወጠን ወእግል አከዶት ሕርየት፡ ሕቁቅ ወሕሸመት ወለት አንሳይት እብ ለደቀበት ወለትነዝመት ገበይ እግል ልናድለ ፋይሕ መጃል ለከልቀ፡ ዐቢ ታሪካይ ምዕራፍ ክምቱ እንዴ ሸርሐ፡ "አሰናይክን" ቢለ።

ኤሪትሮፖ ጸሓክ

ክል አርቡዕ ለትጠ'በዕ ጀሪደት

መዳልየት፡-

- መሐመድ እድሪስ
- ክልሹም መሐመድ
- አድም ሳልሕ
- ሳልሕ እድሪስ

ለይኣውት ወአርተዖት

* ዘህረ ዐሊ

* ፋዋን አድም

ተለፎን። 121797/07121322

ፋክስ። 127749። ዕ.ሰ.ቡ። 247

ተውዝዕ ጀሪደት።

ተለፎን። 200454

አትአመሮት።

ተለፎን። 125013። ዕ.ሰ.ቡ። 1284



ዑብደለ መሐመድዐሊ (መዐልም

እት ዘመን ቅዱም ለዐለው ሓልየት ትግሬ፡ ደለ እለ ትሸነህው እብ ሕላይ ሸርሕው ዐለው። መሰለን እግል ድመል፡ ሻም ፍቲ፥ እቢ፥ ዕየር፥ ሕሚት፥ ሓምዲ ኤነኒብ ውብዕድ። እሊ ህዬ ህግዩ ትግራይት ምን አበን-ጀደን እብ ሕላየ ወዘያታተ ርዝቅት ክምሰል ዐለት ለአፍህመን። ለናይ ዘመን በዲር ሓልየት ትግራይት እግል ሕድ ሕላይ እብ ሕላይ በልሱ፡ ወደለ እለ ሓዘው ለሓሉ ክምሰል ዐለው ለሓልየቶም ለአሸር። ገሌ ምኑ እግል ንሰሚ፡-

እድሪስ ወድ ሃኪን ወሐመድ ሉል ለልትበህሎ ክልኦት ሓልየት ምን ክልኤ ማርያ እት ቅብላት ሕድ ክእነ ሓለው። ከአሰልፍ ሐመድ ሉል እግል እድሪስ ወድ ሃኪን “ለአምር ሕላይ ሐቆናቱ” ቤለ ወህግያሁ እንዲ ኢለአተምም እድሪስ ወድ ሃኪን እት ቅብላቱ ክእነ ቤሉ፡-

ለአምር ሕላይ ሐቆናቱ -
ዲብ ሚ ቴለ ሐመድ ሉል
ሓሌ ኦሮ ወድ ገበህቱ -
ወሐሌ ኦሮት ዕመር ጥዑም
ኦሮት ሓሌ ኦብ ሕመድቱ -
ወተእ ኢኮን ወግሉል
ድመል ግድዐት ከልኦተ -
ወጋሻይ በይን ኢምግዱር
እሊ ወክድ እሊ ሐመድ ሉልመ
እብ እንክሩ እተ እድሪስ ወድ
ሃኪን ለቤለየ ሕላየት ክእኒ በልሱ፡-

መጸአናክ ወድ ሸግራይ -
ግድም ትከምከም ወትዳሌ
ወእግል ምን ሕድ ንእዘምቱ
ወእግል ሰኒ ንትሓሌ

ሕነ ሕላይቱ መለሀይነ -
ለሕነ ወህቱ ንትጋሚ
እብ ኩብድነ እንፍህሙ -
ወእብ ሕልቅምነ እንቃኔ
ክም እክል ንዮብሩ -
እንደብድቦ ወእንፋሬ
ክም ፍሶ ነዐልቡ - ክም
ዋከትለ ሕዳሌ
ሕዱግ እግልናቱ ዲብ ዐድነ
- መለሀይ ለእሉ ንትፋኔ
ምን ግድዐት ተሌነ - ወእት
አስማዋነ እንክሬ
እብ ምንክቡ ገድኦክ ወድ
ኦብ - እኩይቱ ልትፈሌ
እት ምብኦይ ጸነሐክ - ክም
ሰቅለ ዕርጋሌ
ሐመድ ሉል ክእነ ክምሰል
በልሰ አዜመ እድሪስ ወድ ሃኪን
እንዲ ለአተንሰዩ ዐለ ክምሰል

ሕላይ እብ ሕላይ

አክለሰ ህቱመ ቅብላቱ ክእኒ በልሱ።

ሓሌ ዕመር ጥዑምቱ -
ወወድ ገበህ-መ ልብሎ
ሓሌ ወድ ግርሚት ቱ -
እብ ዐራብ መ ወዋኖ
ዲብ ሚ ቤለ ሐመድ ሉል -
ለኦነ ሐይስ ምን ክሉ
እት አተል ወድየ - ግሉል
ምንዲ ትመክሩ።
እት ልብል በልሱ። ሐመድ
ሉል አዜመ እት ቅብላት
እድሪስ ክእነ አትዐረ።

ሓሌ ዕመር ጥዑምቱ -
ወሐሌ ኦሚር ወድ ገበህ
ሓሌ ወድ ግርሚትቱ - ክል
ምዕል እቡ ልትረበሕ
ትበኦሲነ ወድ ሃኪን - ቀድብ
ዲብነ ልደበሕ
እድሪስ ሕላይ ምን አምር-
እቺ ሐክ ልትከበህ
ግራቡ ለአገርም ሐሊብ-መ
ምንዲ ልትበበሕ

አዜመ እድሪስ ወድ ሃኪን
እት ቅብላት ሐመድ ሉል ክነ
በልሱ፡-

ወድ ግርሚት አሰእሎ -
ዝምትት ለበዐለ አስምዮ እለ
እዛዝ ወዕጃል ወድ ዳርሼሕ
- እብ አምሳላት ልቡለ
እድሪስ ወፍካክ ወድ ገብሬስ
- ዱረ አምር ወዕሹረ
ህግዩ ለበዐለ ከልኦየ -
ከደብኦ ዲብለ ሐጽረ።
ክምሰል ቤለ እድሪስ ወድ
ሃኪን፡ አዜመ ሐመድ ሉል ሰኒ
ወአማን ወሰኩ።

ከድመ ዲብናቱ ወድ ሃኪን
- እለ ድቢት ብህላይት
ኦሮት እናስ ኢኮኒ -
ሐርማዝመ ትቀትሎ ሰዳይት
ምን ቀደም ረገዙ - ወምን
ረሐር ዲብለ ነዳይት
ምግዓዝ ፋርህ ህሌኮ - ሀራብ
ወአከይ መካይድ
ጽብጦ ፋርህ ህሌኮ -
ወእሰራት ክምሰል አባይት
ውጽዔ ፋርህ ህሌኮ - እኪት
ተ ከንፈር ዋራይት።

ሐቆ እለ ላተ እድሪስ ወድ
ሃኪን ጀግረ ገብእ “ግድም
ፋርሃምክ ህሌነ ሐመድ ሉል
ቅድረት ምን ብከ እግል
እመን፡ ዕጪይ፡ ማይ ወንዋይ
ሕሌ” ቤለዩ። ሐመድ ሉል ህዬ
እግል ዕጪይ፡ እመን፡ ማይ
ወንዋይመ ኢመሐክዩ ወእብ
ክእነ ሰናቀዩ ከአሰልፍ እብ
እመን አምቡተ፡-

እበንመ ወእድሪስ - ጸገም
ለኦውሕድ ኢተአምሰል
ለመዐር እትለ አግባቡ -
መሕበር እኩቱ እት ዕዝል
ዲብ አካኑ ጸነሐክ -
ኢልትአረጽ ወኢለአብር
አባይከ ትላክፍ እቡ - እንዲ
ተዓሬ ለአረዝን
ዲብ ሐሊብከ ትከርዩ - ቀዲ
እከ ወሐፍን
ለሞተ ቤትቱ ቱ - ከሌብ
እሉ ሱብ አቅብር
አታፍኦ ወድዎ - አንስ እቱ
ለአበሸል
መዋሐን ገብእ ወምደት -
ዐርሰት እንዲ ነአሰፍል
ሰራይር ነዕቅብ እቡ -
ቀይም እክል ምን በሸል” ቤለ።
እንዲ ኦትለ ሐመድ ሉል
እግል ዕጪይመ ክእነ ቤለ፡-
ዕጪይ ምዕርኪያት ቱ -
እምበል እቡ ሚ እነብር

ቀጺር ገብእ ወሞረ - ቲር
ገብእ ወሐክል
ንዌ ገብእ ወምግዘም - አሰክ
እሊ ደረክን
ክላል ገብእ እግል ረኣሰ -
ወመዋቅሑ እሻት ለአፈግር
መተረኣሰ ወድወ - ወጢሾ
ለዲበ ነአፈግር
እግል አክዋር ጸርቡ -
ጠቢብ ላቱ በዐል ብሰር
እግል እንሰ ሐማሳት -
ወእግል አፍሩሰ አሸግር።


ዲብ ደንጎበ ሐመድ ሉል
እግል ማይ ወንዋይመ ሐቱ
ይሐድገ ምኑ። እብ ክእነ ህዬ
እግል ማይ ሐሉ፡-

ማይ ክለ ኦርወሐትናቱ -
እምበል እቡ ሚ እነብር
ዝላም ዘልመት ምንገብእ -
ሰዐርቱ ለእሉ ተአፈግር
ወሰዐርመ ‘ሐ’ ትበልዑ -
ክእቡ ትገብእ ዐጀግል
ግኔ ትወዲ ወድርቂቅ -

ዕንጎ ትወዲ ወሽብር
ጸላሞ ወመንክ - ቀደም
እበን እንበድር
ሰገ ጸዓዲ - ጎባል መሰል
ዐሽብል
ጽረው በቃሪ - መርዒ ጋብእ
ዘረዝር
ዐረሲት ለእት ሰንኩይ -
ዲብ ኢትረግእ ኢነዐድል
ዋከት ሐጫሮ - ትመሌሕ
እከ ወትፈዋር
መዐረይ መቃዋን - ዐንጎ
ጋብእ ጀለጅል
መራኪት ለእት ንሳል -
ግቡል በለዐ እት ሸክር
ሚተ ገብእ ለተወክ - ምን
ዐራዶ ሚ ፈግር
እስክ ጨፍዐ ወሸንተ - አሰክ
ቀርነ ወጽፍር።
ወእብ ክእኒ ሐመድ ሉል
እግል እድሪስ ወድ ሃኪን
አጅገረ ልትበህል።

ዴማት ምን ክታብ ሐልየት ሰነት 1913





ሲያሐት በክት ሸቅል ትፈቱሕ ወሰብ ረዩም ተኣትቃርብ

ሲያሐት እብ በሰር ለትነፈደ እበ ዓማት እተይ ወዓማት አምር ወሌላ ተ። ተናን ለአለቡ መስነዕመ ትትበህል። መትሐዳር ሙእተመራት ዎሮ ምን ገበይ ሲያሐት ለከሰት ቱ። ኤረትርየ መሰለን ምን 5-7 ኖቨምበር እት አሰመረ ፓላስ 23ይ እጅትመዕ አዋፍሐት ኡብካት ተካምል ድወል ምፍጋር ጸሓይ አፍሪቀ ሕድርት ዐለት። ፈርያት ብሰር እዴ አንሳት ኤረትርየ ጅዙእ ምን አትአማር ምስል ኤረትርየ እንዴ ገብአ ርኪት ጽብዋ ዐለ። ወካላት ሰፈርያትመ ለክምስልህ እብለ ህሌን እግል ሊበለ በክት ራክባት ዐለዩ።

ዕዱ 28ይት ደውረት ክድመት ወጠን ሻቦት ሼይመእ መሐመድ ሰራጅ። ምን ወካላት ሰፈርያት አልዋዴ። ልብሰተ፡ ሰርገህ አሰክ ለእት ተርፍ ገይሰ ለሀለ ወነጪት እንዴ ትሰርጌት ምስል ኤረትርየ ወክድመት መአሰሰተ ተኣትአምር ዐለት። እምበልሃመ ልብሰት ወሰርጎ ሳሆ ወትግርኻ ለወክለ ሻባት ዐለዩ። ለህተን ጽብጣቱ ለዐለዩ ርክን መዕረጅ፡ ፈን ወፍዋር ኤረትርየ ወግርመቱ ምን ዐለ እቱ። ሙእተመራን ምን እጅትመዕ አክለ ፈግረው እተ ርክን ለዐሸሎ ዐለው። እግልሚ፡ መስተዕ ወንጉል ለኢገብአ፡ ናይ ዒን ወአሰል ክል ዶል ፍቱይ ቱ። ምዕልክ እት ሻሬዕ ለልትርኤ ለብሳት፡ ግድሎ ወሰርጎ ለለአትወልብ ኢኮን። ክእነ መሰል አሰሊ ናይ ዓዳት ሰርጎ ወልባሰ ሳኪን፡ ነፍሰ ኖሰ ትፈትዩ ወእብ ፍንቱይ ምን ካልእ አካን እግለ ማጽእ።

ሼይመእ፡ ሳወ እንዴ ትከሬት ናይ ሸሃደት ንቅጠት ምን አምጸአት እብ ሐዲስ ክልኤ ሰነት እት ሳወ ምህነት ደርሰት።

ሐቆሁመ ቲኬቲንግ እንዴ ደርሰት፡ እብ ምህነት እት ወካላት ሰፈርያት ትሸቁ ሀሌት። እሊ መጃል እሊ ምስል ሲያሐት ወኣትአማር ዐድከ ለትጸበጠ ምንገብእ፡ ለመጸኢ ጋሽ እት ረአሰለ ሰፈሩ። እብ ሰላም ወራሐት እግል ልትመም ለተሀይበ ክድመት፡ መካሪት ምድር ኤረትርየ ወአርዛቀ፡ ሸዐበ ወዓዳቱ፡ ልብሰቱ ወሰርጎህ ሕድርኖቱ ወነባሪሁ ሚ ክም መስል ተኣትአምር። እት ሸቅለ እግል ጋሻህ እት ተሐብር ህታመ ምኑ ትትዐለም ወነፍሰ ትጠውር። ሸቅለ ምስል አዳም ብዞሕ ሰበት ለትአምረ፡ አደብ፡ ምራድ ወረቅበት ብዝሓም እንዴ አመረት መሳፍራይ እብ ራሐት ክም ልሽዐር እግል ትትዓመል ምስሉ ሰደዩ።

አዋልድ ተዐለመየ ወምህናት ብዞሕ ጽብጠየ ምንገብእ ዐደን እብለ ትፈናተ መጃላት ከድመ፡ ኖሰን እንዴ ነፍዐየ ሀይ እት ዐይላተን ለዐድዩ። “ገበይ ተዕሊም አሰክ ኢደብኢን ምን” እንዴ ትቤ፡ ዋልዴን ምን ተዕሊም እግል ኢለታሩፈን ትትሐሰብ። ዐለቦት አፍሱል በኑመ ካሬ ኢኮን። ምራደን እት ልርኡ ለልአደምዐ ዲቡ ምህናት እግል ለአድሩሰን፡ አውመ ኖሰን እግል ልድረሰ እግል ለአትናዩተን ተኣትፋቅድ። ከምን ምህርህን ምን ሰር ገበይ እንዴ በለሰክ ዲብ ህዳይ ቀሰቡተን፡ አውመ እግል ኢሊሪመ ወኢልፍገረ እት ቤት ሐየርተን እግለን ወእግል አዳመን እምበል ከሳር መክሰብ አለቡ ለልብል ረኣይ በ።

አሰይደ ምሕረት ተኪኤ እት ውዛረት ሲያሐት መክተብ ሐብሬ ተ ለትሸቁ። እትለ ኤረትርየ ለተሐደረቱ ሙእተመር ድወል ምፍጋር ጸሓይ አፍሪቀ ውዛረተ እንዴ ወካላት እብ እዴህ ለሸቁቱ

ፈርያት እንዴ ጽብጠት ቀርቦት። ኖሰ ለፈትለቱ (ብላየ ወቀሚሽ) ላብሰት ዐለት። እቱመ አመት ጋሻህ እት ትወዴ ግጥን ትፋርክ ወትፈትል፡ ወሽሬሕ ለሐዘ ትሸሬሕ እግሉ። ህተ፡ ምስል ፈቱል ትሰፊ፡ ትረክም፡ እብ እንጥኤቶ ትፍዕል ውበዕድ ትሸቁ።

እመ ትፈትል ወአሰክ እብ ሰዐር (እርግሄ) ትሰፊ ሰበት ዐለት፡ እመ ለወዴት እት ትወዴ አመረቱ። “ዲብለ ዘበንነ ብሰር እዴ ዲብ መንህጅ ተዕሊም ኣቲ ዐለ። ክምለ ብዕድ ሕሰስ ምዕሉ እምር ዐለት እሉ” እንዴ ትቤ፡ ዲብ መድረሰት ሀይ ለአምረ ዝያድ ክም አፍዩሐቱ ሸርሐት። አሰክ ሳድሳይ ፈሰል ክም ደርሰት፡ እግል ትትህዴ ምን መድረሰት በዋረት፡ ሰነት ቀደም ህዳየ እት መድረሰት ሳንተ-ኣነ አሰመረ ምህር ወራት ብሰር እዴ ተዐለመት። ዝያድለ እሉ ደረሰኩ እብ መግደረት ኖሼ ትጠውር። አሰክ እለ ዮም፡ ምን ኖሼ ለሐሰቡ ልግበእ ወምን ብዕዳት ለርኤኮህ እት እወሰክ እገይሰ ህሌኮ። ወለፍትሁ እግል እትገሌ ምኑ ይእቀድር። አነ ሌጠ ኢኮን ለመቅደረት ዲብ ክለ ኤረትርየይት ሀሌት” እት ትብል እት ኤረትርየት ለሀሌት እለ ስቀት ተአበርህ። ምናተ ወራት ብሰር እዴ ምን መንህጅ እብ ፍግረቱ ዲብ በዳሁ ሸንርብ እኪት ጋብኣት ሀሌት፡ እት ትብል እግል ለአቅብል እተ ከሰሰ ልእክትን እግል ንኣልፍ ትፋኔት።

አሰይደ ምሕረት ፈርያተ ማል እግል ትርኩብ ምኑ እንዴ ኢገብእ ኖሰ እግል ትዕፈዩ ወእግለ እሉ ፈቱት ዲብ መናሰባት ዐቢ ክም ህዳይ መስል ዶል ተሀይብቱ ለትትበሰዋ። ክሰሰን እንዴ ተምኔት ለሸቁቱ ወለዐጅበየ ፈርያተ ካልእ አካን ሊጊስ ምን ኢትፈቱ። ክም ዓማት እተይመ ኢትሕሰቡ ድኢኮን ለልትጠለብ ወለልትዘቤ ፈርያትመ ሀለ እለ።

አዋልድን ብሰር ኢለአብዩ፡ ንዩተን እግል ትፈቱሕ ለሓለት ጣፍሐት ኢሀሌት ድኢኮን ለመቅደረት እት ከርሰን ድብድብት ሀሌት። እግል መሰል፡ አነ እት ሳልሳይት ወራብዓይት ደውረት ክድመት ወጠን እብ መሕበር ወጠን አዋልድ አንሳት ኤረትርየ ዐዘመት እንዴ ገአት እዩ እድርሰት ዐልኮ፡ ሰኒ በሰጠደ። ሐበትመ ለአምረ ለይዐለየ ብዞሕ ብሰር ለተዐለመየ ሐዳት ኢኮን። ለብሰር እት ነፍሰን ቅቡር ሀለ ለለአተብለኒ፡ ዲብ ሳወ እብ እንጥኤቶህን ወአግዳደን ለትከረየ ዐለዩ። አክለ ትገሰየ እቱ ለአመሀዘክ፡ ዲብ ፊራሮ ከረምመ ክምስልህ ለውላድ ኩረት ዲብ ልተልሀው ህተን ምስል አግዳድ ወክዐሌ እርእዮን። ምን ለሐውነ ሕድ ገድሎ፡ ግድሎመ ፈን ዐቢቱ በሃሊትተ አሰይደ ምሕረት። እንዴ አትሌት፡ ውዛረት ተዕሊም፡ አዋልድን ፈን በዲር እግል ለአቅብል ወምኑ



ወኪን እግል ልትጠወር ለሕሰስ ፈን እግል ትብለሱ ትፋኔት። ለበክት ወትረከበ ኖሱ ለአዋልድን ልትፈነከ ወፈለሐ፡ በሳርያት ተን አጊድ ጽብጠ ወሐዲስ አጊድ ልምህዘ እት ትብል ሀይ፡ እት አግማም ሐዲስ ለሀሌት እለ ስቀት አተበተት።

አብረህት ተኽሌ ዕቱል ምን ውዛረት ሲያሐት ሀይአት ዕላቃት ዓማ ተ። ህታመ እተ እጅትመዕ አርዛቅ ኤረትርየ ተኣትአምር ዐለት። ሲያሐት አክል አዩ እግል ድወል ክም ትነፈዕ እት ትሸሬሕ፡ ሕነ በሐር ውበዕድ የም አለቡ አርዛቅ ብነ። ወህተንመ ብዕድ አርዛቅ በን ክልነ ለድወል አድሕድ አመርነ ምንገብእ ወሸዐብነ እት ሕድ ጌሰ ምንገብእ እግል ዐቦት እቅትሳድ ግዴቱ ዐባይተ። እድንያይ እጅትማዓት ነኣሽከ ዐቤከ አለቡ ፍርሰትተ እግል ልትአመር። ሊጋሽ ምን እሊ መዕረድ ብዞሕ ለዐጅበየም ሀለ። እብ እዴ ለልትሸቁ ዮም ዲብ ልውሕድ ገይሰ ሀለ። ዲብ እሊ ምን ከዐሌ ምን አግዳድ፡ ምን ከላት፡ ምን ገኖ፡ ምን አሻም ለልትሸቁ ናይ ክለን ቅምያት ፈርያት ዶል ረአው ተዐጀበው ወለነሰአውመ ሀለው። ወዘረት ሲያሐት ኢትዮጵየ አሰይደ ሂሩት ካሰው፡ ክሉ እሉ ረኤት ለዐጅበ ዐለ ወገሌ ሓጃትመ ትዛቤት። እሊ ሀይ እለ ምፍጋር ጸሓይ አፍሪቀ እት ሕድ ጌሰት ወመጸት፡ ምን ሕድ ትዛቤት ወአዘቤት ምንገብእ አክል አዩ አብካት ሸቅል፡ ተፋህም ወአምር ሕድ ወእቡ ዐቦት እቅትሳድ ውሓዘ ሰላም እግል ልዝረእ ክም ቀድር ምን እሊ እግል ንፍሀም እንቀድር ትቤ አሰይደ አብረህት። ሲያሐት ሰብ ካርጅ ለትከሰስ ሌጣመ እግል ንንሰአ አለብክ፡ ሕናመ እንዴ ትክምክም፡ ዐድነ ወአርዛቀ ኖሰን እንርአዩ ወንትነፈዕ እቡ። ሕነ ክም አመርናሁ ወፈቱናሁቱ እግል ብዕዳም ለነትአምሩ። ከሕናመ ኢንሕመቅ እንዴ ትክምክምን ንትነፈዕ ምኑ ትቤ።

እንዴ አትሌት፡ ወራት ብሰር እዴ እግል ልትለመድ ወልትጠወር ለቡቱ። ለገብኣት እሊት እት ቤተ ምን ውላደ ወዕያለ እንዴ

ኢትረይም እግል ትሸቀዩ ወእተይ እግል ትርኩብ ምኑ ለትቀድር ቱ። እብ ገበይ ዋውር እግል ልዕቤ ወልትሐፈዝ ለከሰሰን ጅሃት ተዕሊም ምህናት ለልትጠወር እበ ገበይ እግል ልባሰረ ሀይ ትፋኔት።

አሰይደ ንግስቲ ገብረመስቀልመ እትለ ሙእተመር ናይ ዐሰር አንሳት ፈርያት ለትቀደመ ዲቡ ርክን ዲቡ ዐለት። እቱ ቃርብ ለዐለ ፈርያት ከላት አግዳድ፡ ገኖ፡ አሻም፡ ከዐሌ ምን ለምደወ ገበይ ሸቅየት ፈን ፍንቱይ ምን ገብአ ለኢተዐጀበ እቡ አለቡ፡ “እብ አማን እሊ ዲብ ኤረትርየ ለፈራቱ?” እት ልብሎ ልትዐጀቦ ክም ዐለው ሸርሐት። ሀደፍለ ሙእተመር አምር ሕድ ወተካምልቱ፡ ወአክልሕድ ዘበዋናሁ ትቤ። ቀደም እለ እትሚ እንዴ ዐልነ እግል ንርኤ ወንትረኤ እተየ በክት ረከብክ፡ ሳኪን ኢትገሌነ አክለ በክት ትረከበ እብ ፈርያትን እንቀርብ። እት ወሬሕ ኖሽምበር ሌጠ እት ክልኣት ሙእተመር አፍሪቀ ሻረከየ ወሐምዴ ረክበዩ። ቦርሰት እብ ሸክል መሕዘል፡ ጀምቢል እብ ሸክል ቦርሰት ለትፈናተ ዕላመት ኤረትርየ ለብእቱ አዳለዩ። ለሀለ እነ ፈርያት ፈን እግል ልፍገር እት ክል አካን ፈርያትን ለልትዘቤ እቱ መካዝን ዐቢ እግል ለሀሌ ወጅብ። አግደ እሊ ለወዴ ሀይ እብ ዝያድ መሕበር ወጠን አዋልድ አንሳት ቱ። እብ ኖሱ ልግበእ ወእብ ገበይ ሰብ ሸርኩቱ። እግልሚ አንሳት ፈርያተን እብ ዐውል ረኪስ ልትዘቤ ሀለ። መሻርፍ ነኣሽ እብ ሰለሰ ወዐባዩ እብ ሐምስ ነቅፈ ዲብ ለአዘብያሁ። እለን ፈናንያት እምበል ዐውል ከዐሊህን ለነሐረን ኖሱ እት ሕሳብ እንዴ አተ ዐውል ረክበ እቱ ኢሀለዩ። እብ እመር ለልኣዘብየ እተ ዕዳገ ረክበ ኢሀለዩ። እግለን ለለረቤሕ ወእግል ኖሱ ለረቤሕ ሸክል መአሰሰ ለቡ እትጀህ ኢሀለ። ምስል ዕዳገ ለልትጠለብ ፍኑን ወበሰር ለለርእየን ወአፍካረን ለነሰእ መአሰሳት ተጃረት ኢሀለ። እሊ ወወራት ብሰር እዴ ዲብ መናህጅ ተዕሊም አተዮት እግል ልትሐሰብ እቱ ትፋኔት አሰይደ ንግስቲ።





ሓምድ እድሪስ ዐዋቱ

ለእብ ሀይለማርያም ወልደ-ለትክተብ ወእብ ክልሹም መሐመድ ለተርጀመ “ሓምድ ዐዋቱ ምንቱ?” እብ ልብል አርእስት እብ ትሉሉይ ዲብ ጀሪደት ኤራትርያ ሐዳስ ፈግር ለህላ ክቱብ ምን ምዕራፍ ሴፊ 2ይ ክፊል እግል ንርኢ

ፊራሮ ዐሰከር እንግሊዝ ድድ ሓምድ

ክምለ ትበህለት ከረ ሓምድ እግል ክልሉት ለጅነ ወምን ሕሌጊንቱ ወምን ኢቲንያይ ክም ነስኦምም ለውዲት እግል እዳረት እንግሊዝ ነከደተ። ሰልሐም ትሳለብ፤ እት እዳረቶም ተሐሰፈው፤ ሓምድ ምን ንዋይ እንዴት ሐልፈ ኣጀኒት ምን ዐዘገ ነፍሶም ክም የሀሌት ዐለበወ። እብላ ሀይ ድድ ሓምድ ሐምለት ዐባይ እንዴት ኣትፈረረው እግል ለአርክዕው ሰታት ኣፍገረው።

እት 1948 እንግሊዝ ቃይድ ፖሊስ ኮሎኔል ክራክኔል (ሰብ ጋሽ በርክ ከራኪን ልቡሉ) 50-60 ለገብኡ ፊልድ ፎርስ እንዴት ኣትበገሰ፤ እግል ሓምድ ዲብ ቀበት ምር ወሬሕ እግል ልቅቶሉ ኣው ልጽቦጡ ኣዘዘ።

እግል ፊራሮ ለመርሐ፤ ዲብ ኣቅርደት ለዐለ መሐመድ ዐሊ ሲኪንጃ ለልትበህል ምን ቀቢለት ሻጊ ላቱ ሱዳን፤ በዐል ሰለሰ ኮኩብ ካፒታኖ ዐላ። ሲኪንጃ ምን ባረንቱ ልትበገሰ ዲብ ሀላ፤ ልእኩቱ እንዴት ኣትመመ መጽኢ ምን ገብእ ዕዳዩ ክምቡ ክሎኔል ክራኪን እትሰኡዩ ሰበት ዐላ፤ ዐሳክሩ እንዴት መርሐ ዲብ ለሀፍት፤ ኣንቶራ ሐልፈዩ ከመሓዛት ወኣድብር እንዴት ካዩደ ቲቱክ በጽሐ።

ሓምድ ለኣትኣሱሩ ክም ሀለው ሐብሬ ክም በጽሐቱ፤ ዲብላ ክል ዶል ክም መበገሲ ለልትነፊዕ እብ፤ ዲብ ዋት ኣንቶራ ዲብላ ሀላ ደብር ቡቢ ድዋራት ተከዘ ትጀልሐወ ምኖም። ሲኪንጃ ኣሰሩ ገብኡ። ምን እግሩ ተሪፍ እንዴት ኣበ እግል ለዐርዩ ቅሩባይ ክም ገብኦ ሀይ፤ ሓምድ ጀህት ምውዳቅ ኣውጋሮ ገዱ ኣሰክ ቶሎው ትነወከ ምን። ለዶልመ ኪሲንጃ ምን እግር ሓምድ ኢተርፈ። ምን ሀርበ ምን ዝያድ ጠሐረ፤ ደለ ሓምድ ኬደየ ኬደ።

ሓምድ ምን ኣመረ ረኣዩ ምን በድል እንዴት ቤለ እብ ህዓዩ ዋልያን “ኣነ ሰብብ የሐዘኩክ። ምን ሀረብኩ ምን ኣሰርዩ ትገብእ ሀሌከ። ምስልክ ድምነት ኣለብዩ ወዐዳወት፤ ትገሴ ሰላም ሀበኒ” ለልብል ጀዋብ ነድኦ ዲብ።

ዐሊ ሲኪንጃ ላኪን እግል ልኡክ ሓምድ ክም ናይ ኢረኣዩ። እብ ትርኢኒ “እግልክ ኣምዲትክ እንዴት በርዘዋኮ ኩብደትክ እንዴት ኣፍገርኮ ኢበልዐኮ ምንገብእ ኩብጃ ኢትሰክብ” ለልብል በለሰ


ነድኦ ዲብ። ሐቀሁ ዲብ ጀህት ግብለት ሀይተት ዲብላ ሀላ ደብር ኤኩሪ ተለዩ። ለዶልመ ሓምድ ክምለ ኣወላይ ጀዋብ ለመሰል ጽበጥ ለቡ ጀዋብ ነድኦ እቱ። ዐሊ ሲኪንጃ ላኪን ለጎማቱ ኢበደለ ምን። ኣትኣሳሩ ኣተላለ። ኣሰኣሰር ሓምድ ‘ላመ’ እብ ትበህል ዐድ ናይ ነረ እንዴት ሐልፈ ኣሰክለ ፍንጌ ሀይተት ወጎጃ ለሀሌት ቤለ-ደረ ደርቡ ገብኦ።

ዐሊ ሲኪንጃ እግል ሽዑብ ‘ምርሐ’ ዲብ ልብል፤ እንዴት ኣሰረ እብ ክርባጅ ወኣሸዋክ ገርፋ ሰበት ዐላ፤ ሐቱመ ምዕል ትግበእ ከበር ሓምድ ስቱር ምን ኢለኦምር። ምን ጀኣራቱ ለኢሸኪ ወምን ለኢሰኪ የዐላ። ዐድ ሕሹል መጎራዮብ ለዐዱ ድግለል ሼገ ኪነ ኣሹ ምር ምን ሀድፍ ኪሲንጃ ጋብኦቱ። ሼገ ጠባዩዕ ኪሲንጃ ፈቅድ ዲብ ሀላ ነፍሱ ሽዕለለት ተዐርገ።

ለእናስ ለሀይ መሰኡል ዐሰከሪ ናይ እንግሊዝ ዐላ። ከረ ሓምድ እግል ልትነጌ ወሽዑብ እግል ልበሸትን ለትበገሰ ነፈር ጃእርቱ። ምን ሸፍተ እንዴት ኣዘመ ዲብ ሽዑብቱ ለልትደገሕ። እብ ክርባጅ ኢለሐድግ ወእብ ሞራ ደለ እት እዳሁ ሀሌት እብ ካሬ ዲብክ። ወድሐንክ ኣለብ፤ ኣሰክ እት ቅያብ ተኣቱ ከረምድ ለኣፈግር ምንክ።

ምዕል ሐቱ ምን ቃብል ክም ረኤክወ እግል ሀረብ ጀረብኩ ከዲብ ወደግ ምር ኣቱኩ። ምር ዐሰከሪ ናራይ እት ቀደምዩ ሰበት ጸንሐ ላኪን ኢፈገርኩ። ጽብጠወኒ ከክርንክራት ኣሰረወኒ። ለዶል ዐሊ ሲኪንጃ “ሓምድ መንዱቁ ዲብ ዓጻቱ እግል ንሳብሩ እካቱ። ኣየ ሀለ? እብሊ ዋርቅ ኣንፍክ ኣካኑ እግል ተሐብረናቱ። ሰላሕ ሀይ ብከ? ቤሌኒ። ዲብ ብዩ ኣለብዩ እቤሉ። ላኪን ሚ እግል ልግበእ። ምር ፋይድ ለልትበህል ጃሱሰ ‘ኣቡ ሐዲድ ምንሸር ሀሌት እሉ’ እንዴት ቤለ ሰበት ኣፍተነ እብዩ ኣሰክ እዳዩ ልትኣበጥ እብ ሞረ ከረምድ ወደወኒ። እምበል ዕርፍ ዶልክ እንዴት ትወለበ እቱ ክም ደግደጌኒ እግል ሀረብ ጀረብኩ። ላኪን ኢቀደርኮ እንዴት ትጸበጥኮ እደዩ እብ ሐብል ሹብ እንዴት ኣበለው ኣሰረወ። መርመረ ኣተላለ “መንዱቅ ሐቆ ሀለ እንተ ዲብ ሐርብ ያበል ዐሳክርን ምን ቀትለው ምር እንተ” ዲብ ልብል ሰኣላት ኣብዘሐ ዲብዩ። ኣነ ላኪን “ኣላሁ ዓልም ኣነ ላቱ እሉ ቀተልኮ ዐሰከሪ ወእለ ወዳኮ ጀሪመት ኣለብዩ” እንዴት እቤ ኢለኦምኮ እሉ።

ዲብ ሰኣል ብዕድ ተዐደ። “እግል ሓምድ ኣፎ ዐፋኒ እንዴት ቤለ ክም ለኣቱ ኢትወድወ?” ቤሌኒ። ክለ ህግያሁ ናይ ሐለት ተ። ለዶል እግል ልእኪ” ሕናመ



ኣደሚ ሕነ ሐንገል ብነ ለእቡ ነሐሱብ እግልሚ እንቤሉ። ወእትሚ መሰኡልየት እንረፈው። እለ ምንገብእ ቅበጽ ሌጠ ሰመዐክ ኣለቡ” እቤሉ እንዴት ሐጠርኩ። ሸፍግ ሰበት ዐላ ገበይ ለመሬሕ ኣዳም እንዴት ኣተምጸኦ ሰፈሩ ኣተላለ። ኣነ ለሐድገኒ ገብእ እብል ዐልኮ ላኪን ኢመሐኪኒ።

ዲብ ኣፍ ኣዳል (ፈደደ) ክም በጽሐነ ሓምድ ለልሐልፍ እበ ገበይ ሕዜ ቤሉኒ። ዕጭ ሐከልኮ ዲቦም። እሱር ዲብ ኣነ ሀይ እግል እትኣዘዝ! እቤሉም። እበ ብግርዩ ወዲብ ምድር እንዴት ኣተክረረወኒ ‘ተሐብር እንተ መኢኮን’ እት ልብሎ እብ ክርባጅ ኣምዲትቼ ኣብለወኒ። ሼገ ወድ ኪነ ሓሳይቱ በደል እትበህል ንሳልዩ እብ ሰኪን ብቶኩ ኣውመ ረሳሳት ኣድርሩኒ ኣርወሐቼመ ንሱእ እለ ዳሊ ኣለብዩ’ እቤሉም። ምን ክትረት ለእለ ገርፈወኒት ኣሰክ እጠርሸ ገኣኩ። ኣሰክ ክእነ ጀሪመት ጋብኣት እቼተ እብ ዐሊ ሲኪንጃ። እሊመ ኢከፈ ኣሰክ ዲብ ባርንቱ ትሰጃንኩ። ወምን ዲብ ሐብስ ዓዲ-ጂለ ሐለፍኮ ወሐምስ ሰነት እግል እትኣሰር ትፈረድኩ። ደሐንቱ ረቢ ሀለ ዲብ እብል ሀይ ሰነት ክም ተኣሰርኮ ምስል ብዝሓም እሱራም እብ ሰምሐ ፈገርኩ።

ሲኪንጃ ብዝሓም ለዐዘበ ጃእር ወሀመት ለሀ ወለሀ ለኣለቡ መክሉቅ ቱ። ዲብ ሃምቦክ እግል ናዝር ኣዳን ለልትበህል እናስ ዕጉል እብ ክርባጅ ቅልጥ ኣበለዩ። ሰብ ንዋይ ሰኪሕ-ኪሕ ልብሎ ምን። ከም እሉም ኣትዋዕ። ዲብ ኣሸሊ-መጎራዮብመ እግል መንታይ ዐንጀ ዙቡጡቱ።

መንታይ ዐንጀ ምን ሼገ ልንእሽ ዐላ። ሀቱመ ዲብ እዳ ሲኪንጃ ባርድ ሰበት ዐላ። ኣሰር ሼገ እሊ ተሌ ደግመ።

ምዕል ሐቱ ምስል ሐዩ ኣተሃይ ውዕላም እንዴት ዐልነ ዲብ ነኣቱ። ዐሊ ሲኪንጃ ምስል ዐሰከሩ

ዲብ ኣብቁል እንዴት ትጸዕነው ኩብ-ኩብ እት ልብሎ መጽኡ ዐለው። ቀደምዩ ሐቱ ረኣዮም። ‘ሌሆም የም ኣለቦም ሰብ ኣብቁል ኣሰክነ መጽኡ ሀለው፤ ሀየ እኑ ሀየ! ሀየ! እንዴት ቤሌኒ ሀርብ። ኣነ ላኪን እግል እምለጭ ምኖም ሰበት ኢቀደርኮ ኖሱ ሲኪንጃ እንዴት ዐሬኒ ሰላም ኢኮን ወሰኒ ውዕላም ‘ሓምድ ረኤኮ?’ እንዴት ቤለ ትሰኣሌኒ። ሰኣል ወሞረ ዐሊ ምስል ሰበት ገይሰ እግል ዋረዮቱ ክም ረኤኮ ‘ኣሆ ረኤኮ’ እቤሉ ለዋሽዮቱ እንዴት በደርኩ። ‘ኣየ ረኤኮህ?’ ማሌ ዲብ ትሊት እት ሐንቴለ ዐቅቤተት ዐባይ ውዕል እንዴት ዐለ ኣምሱይ ጌሰ’ በለሰኩ። ሲኪንጃ ላኪን ረኤኮ ምን ትብል ወኢትብል መዕነት ሰበት ኢለሀይቡ እንዴት ኣጭገድገደ እብ ክርባጅ ትሰከፈ እቼ። ለዶል ተሃጌክ ወኢተሃጌክ ክሉ ሂሉ እንዴት ገብኦ ዲብዩ ክምለ ግንዳይ ተከልኩ። ሐር ላኪን ምን ሕኔት ምስሉ። ሂገ ምስሉ ካልቅዩ ተሐይሰኒ እቤ ከ”ላ ሐውለ ወላቹወ ኢለ ብለህ” ሐቆ እቤ ‘ረቢ ሐክመየ እትነ እንታዲ በዐልሚ እንተ!’ እት እብል ተራቀምኩ። ሚ ትቤ? ክም ቤሌኒ ላኪን ፈርሀክወ ‘ሐቱመ፤ እድሕር ሀሌኮ’ እቤሉ። ጋርዩ ኢወደ፤ ዐሳክሩ ዲብ ተልወ ገበይ ዱረ እንዴት ጽብጠ ጌሰ።

ዐሊ ሲኪንጃ ገበይ ዱረ እንዴት ጽብጠ ለጌሰ ግምሽ የዐላ። ሓምድ እቡ ሓልፍ ክም ሀለ ሐብሬ ዐለት እሉ።

ኮረት ዲብላ ትበህል ዐድ-መጎራዮብ፤ ዐሊ ሲኪንጃ ዐሰከሪ ዋልያን እግል ዐለ ዐብደለ ሼክ ለልትበህል እናስ ዐቢ “ኣካን ሓምድ ሐብረኒ” እንዴት ቤለ እብ ሞረ ከረምድ ወደዩ። “ለእናስ ዝብጣት ክም መረት እቱ” ልብል ጀዕፈር ያሲን፤ ሐብሬ ወመርገም እንዴት ወሰከ እብ ትግራይት ሸዐረ

ተከለምበ ወቡቢ እሉ ፋቲ ነብር ወድ ዐድ ፋይዶም ምን ከደን ዐድ ኢልብል መሰለኒ ገበይ ዱረ ናሰእ ቱ ቱቡይ ኣነ ዳብጥ እግሉ ለሐዳ

ደሐን ኢለቀብል ወእሲቱ ኢልርኤ

ሲኪንጃ ኣሰ-ኣሰር ሓምድ ዲብ ገይሰ ቀደመ ለጸንሐዩ እንዴት ከራመደ ሌጠ ለሐልፍ የዐላ። “እቅባለቼ እግል ትርኣወኒ ቱ” እንዴት ልብል ለዓድም እሉም ዐላ። እዳሁ ለትክሬት እቱ ሹም ባምቡኒ ወናንብ ለዐለ ቀጢን ሸርኤለ “እሊ ክሉ ዲብን ትወድዩ ለሀሌክ ጀራይም ሓምድ እግል ትርኩብ ገኣክ ምን ገብእ እግል ኣቅብልቱ እንዴት ትቤ ኢትሕሰብ። እንሻለህ ዲብ እዳሁ ትወጌዕ!” እንዴት ቤለ ረግመዩ

ልብል ሓምድ ሼገ።

ሓምድ ዐዋቱ ዲብ ለሀርብ መጎራዮብ ክም በጽሐ ሳልሰ መረት እግል ሲኪንጃ ፦

ሰብብ እንዴት ሐዜክ ኣሰርዩ ኢትግበእ። እለ ነስኣኮ ምንክ ኣለቡ ወኣከር ዲብ ኣድሕድ ኣለብኩ። ፈርሀክ ከምን ተከዜ ኣሰክ መጎራዮብ ሰኪኮ ምንክ። ወኣሰክ እለ ምን ኣሰርዩ ተሪፍ ኣቤክ። ትደክል። ኣነ ይሐዘኩክ። ደምክ የሐዘ ወደምዩ ኢትሕዜ። ሕነ ንዋይን ለዘምተ እሉ ዘመትነ ድኢኮን ምንክ ሚ ነስኣኩ። እሰላም ምስልክ ሀሌት ወእሰላም ምስልዩ። ተሓገለኒ። መጽኣከኒ ምን ገብእ ላኪን ኣናመ ሐሊብ ጸውር ይህሌኮ! ለልብል ጽበጥ ለቡ ጀዋብ ነድኦ ዲብ። ምናተ ዐሊ ሲኪንጃ “ኣሰክ እብ ኣርወሐትክ እጽብጠክ ኣውመ እብ ረሳሳት እከንፍለክ ደንበር እንዴት ወዳክ ዲብ ዐሰተር ምን ትበርር የሐድገኩ። ወእት ምድር ምን ትለምም ይኣተርፍ ምንክ። እናስ ምን እንተ ጽንሐኒ። እብ እዝንክ እንዴት ዋሌኮ ልባሰ እሲት የኣልበሰኩክ ምንገብእ ኣነ የኣነ” እት ልብል በለሰ ኣደፋራሰ ነድኦ ዲብ ከክርፋሁ ኣተላለ።

ሲኪንጃ ኣክል እሊ ልትበዘሕ ለዐለ ምን ኣዳመ እንዴት ሐለ ኢኮን። እምነት ሐለተ ቀላል ኢኮን። ፍቀረ፤ ረሳሳት እግል ኢትቅተሉ ለከፊዕ ምን ኣሰርየት ዲብ ሐሊብ ኣግል እንዴት ሓበረው ለኣሰትወ ዐለው ልትበህል፤ ከእንዴት ተሓረበ ልትጀረሕ ለኣመሰል የዐላ። ምስሉመ ዐ-ሰማን ሎንጊ ለሸፍታይ ድቁብ ምስል ሓምድ እንዴት ትበኣሰ ፍንቱይ ምን ሰበት ዐላ። ከእብሊመ ሲኪንጃ እግል ሓምድ ምን ኣርቀ እቡ ኣከይ መካይድ ከይድ ዐለ ልትበህል። እብ ጽጋብ እንዴት ትፈኒኦ ክም ኣደሚ ሞት ክም ሀሌት ለትረሰዐ መሰል ዐላ። ዐ-ሰማን ሎንጊ፦

ዲብ ኮፈ-ሾጋር ለልትበህል ዐድቱ። ሲኪንጃ ኣዳም እንዴት ትሰኣለ ምስል ሓምድ ክም ትፈናቱነ ሐቆለ ኣከደ ‘ሓምድ ኣዜ ትጌገ። ዐ-ሰማን ለኣለቡ ነፈዕ ኢረክብ፤ ዐ-ሰማን ኢህለ ምስሉ በህለት። እዳ ማኑ ትበተከት በህለት ቱ። ክልኢቶም እዳ ማን ወገሉብ ናይ ሐቱ ክልቀት ዐለው’ ልብል ዐለ ልትበህል።

ሲኪንጃ ሐቆለ እግል ሳልሰ መረት ለሀበዩ በለሰ ኢፋሉታይ፤ ለእለ ትበህለ ምን ልትበህል ሕሳቡ ክም ኢቀይር ተኣከደ። ሐቱ ዶል ሰበት ተዐንደቀ ሞት ተሀሌ ዲብ ወሐዮት ምን ኣሰር ሓምድ የኣቅበለ።

ሲኪንጃ ኣሰርኒ ዲብ ለዐሬ ምን ኣጀረቤ። ዲብ ኣርቱገ ለትበህል ኣካን ርምነ ምን። ዲብመ ተሌነ ወለሐዜነ ክም ሀለ ሽዑብ ክም ሐበሬነ ዲብ ኣልገዳን እግል ንታክዩ ሐሬኒ።

ጥላድ ሰፊር 'ቢ' (Hepatitis B) ወኤቶ ኣይ ሺ

ሰፊር ለእብ ለመድ ዕንታት ወገኖብት ቤጪ ለወዳ ገሌ ክፈል መጽተመዕነ ወይቦ ለልብሎቲ። ክሉ ሰፊር ላኪን ዕንታት ቤጪ ወዳ በህለት ኢኮን። እሊ እንዴ ኣትሌነ ለነህድግ እቲ ሰፊር ለእግል ኩብደት ለልሓምም እብ እንግሊዝ ሄፓታይትስ በህለት ረክሰ ኩብደት። እሊ ሀዩ ብዕደት ሰማይት ምን ኢረከብነ እሉ ሰፊር ብህላሙ ሀሌነ ድኢኮን ምስል መትብጫይ ዕንታት ብዙሕ ተእሲር ለህለ እሉ ኢኮን።

ሕማም ኩብደት ለለመጽእ ኣሰባብ ብዙሕ ምንመ ገብእ ለእብ ረክሰ ሻይረስ መጽእ ዲቡ ሌጠ ምን ነህድግ። ኩብደት ለልሓምም ሻይረስ ምን እሙር ለህለ ምን ሄፓታይትስ ኤ። ቢ፡ ሲ፡ ዲ፡ወኢ ቶም። ምን እሎም ሀዩ እብ ብዝሒ ለልትረኣው ኤ። ቢ ወሲ ቶም። ምን እሎም ለትኬለመ ለሄፓታይትስ ቢ ለልትባህል።

ዲብ ኤረትርዮ እትሊ ወክድ እሊ እት እት ጀድወል ክታብት እንዴ ኣተ ኣጀኒትነ ሰነት እንዴ ኢለኣተም ምን ሕማም ሄፓታይትስ ቢ ለልሕጅቦም ክታብት ነስኣ ሀለው ወእሊ ኣሰክ እብ ኣዮት ሀለው ለዳፊዕ እሎም። ምናተ ለክታብት እግል ምን ሰነት ወተሐት ለሀለውቲ ልትሀዮብ ለሀለ። ለቀደም ክታብት ለትወለደው ሽባብ ወወባዩ ላኪን ምን እሊ ኩብደት ለልሓምም ሻይረስ ለልሕጅቦም ሕጌ ኣው ክታብት ሰበት ኢጸንሐ እሎም ምን እሊ ሕማም ነፍሶም እግል ልዕቀቦ ሌጣቲ ለሀለ እሎም።


ሄፓታይትስ ኤ ምስል ሸን ከደን እብል ትጸበፍ ርስሐትቲ ምን ሕሙም እት ሕያይ ለለዕዳ። ሸዑብ ማይ ጽሩይ ሐቆ ሰቲ ወእዴሁ እብ ዋጅብ ቀደም ነብረ መትባጋል። ሐቆ ሸቃቅ መትነፍቶት ወቀደም ኣዳላይ ነብረ እብ ማይ ወሳቡን ናይ ሕጽብት ለመድ ጠወረ ምንገብእ። ምን እሊ ሕማም እግል ልንጄ ቀሊል። ለበዘሕ እሊ ሻይረስ እሊ እብ ኖሱ ለሐድግ ዐደድ እሊ ሕማም ዳይም እንዴ ገብእ ለነብር ኢኮን።

ሄፓታይትስ ቢ (ሰፊር ቢ) እት ክለ ዐለም ለሀለ ወዳይም ሕማም ኩብደት እንዴ ሰበበ ኣሰክ ሰረጣን ኩብደት እግል ለኣብጼሕ

ለቀድር ሕማም ከለም። ምስል ኤቶ ኣይሺ ለለኣትማስሎ ሀዩ ሀለ። ክልኢቶም እብ ሻይረስ ለመጽኢ ቶም። ክልኢቶም ምን ሕሙም እት ሕያይ እብ ደም ለዐዳ። ክልኢቶም እት ክል ፊሻይ ገሮብ ሀለው እት ደም እብ ዐበሁ። እት ጅናብት፡ ፊሻይ ርሕም ኣንሳይት፡ ምራቅ . . .

ምን እም እት ኩብድ ዲብለ ሀለ ጅነ ሀዩ ኣቦት እንዴ ሐልፈ ለኣቲ ለትብል ኣኪደት ኣሰክ እሊ ምንመ ኢሀሌት። ጅነ እት ልትወለድ ዲብለ ዕንድር ወለድ እብ ሀለ መትሐራካክ ምን ደም እሙ እግል ልዕዳ እቲ ክም ቀድር ልትኣመር።

እት ኤርትርዮ ሄፓታይትስ ቢ ዲብ ክለ ኤረትርዮ ክም ሀለ ልትኣመር። እት ኣቃሊም ቅብለት ወግብለት በሐር ቀዩሕ ሀዩ ምን ብዕድ ኣቃሊም ብዝሕ ብህል ልትረኤ። እሊ ኣለት እሊ ሀዩ ለተኣሰክብ ኢኮን። እግልሚ ዐደዮ ሰፊር ቢ ኣው ሄፓታይትስ ቢ ምን ናይ ኤቶ ኣይ ሺ ለሸፍጋቲ። ሻይረስ ምን ገብእ እግል ልኣይዩ ለቀድር ደወ ኣሰክ እሊ ኢሀለ። ለሐሰት ምን ቀዳምክ መትነጃይተ። እሊ



በህለት ሀዩ ምን ጅመዕ መትሐራም፡ እግል በዕል ዐቅድነ ኣግንዖት። እለን ክልኤ እት ኢልትቀደረ ምን ጅመዕ ጥሉቅ ነፍሰክ እንዴ ሐጅብክ እብ ኮንዶም ሌጠ መትነፍቶት።

ሀቲ ሌጠ ኢኮን፡ ኣዳም ምስል ደም ለልተናከፍ ኣጃት ብሉሕ ምኑ መትሓፋዝ ዋጅብ። እት ቤትነ ክል ዕዱ ዓይለት ብራሹ(ምስዋኩ) ናይ በይኑ ሌጠ እግል ልትነፊዕ፡ ኣጀኒት ዶል እንላጼ ጅናክ እብ ላመት ሐዳስ ወናዩ ሌጠ እብ እግል ንላጸዮ ብነ። ዐባይም ምን እብል ኢትፈንቴ ክል ምሮ እብ ላመቲ እግል ኖሱ ሌጠ እግል ልትነፊዕ ወጅብ። ኣጀኒት እብ ኣላት ብሉሕ እግል ኢልተልሀው፡ ልኩፍ ለጸንሖም ሰሪንጋት ወእበር እግል

WHAT IS HEPATITIS ?

Hepatitis virus causes infection and inflammation of the liver

400 million people live with Hepatitis

6-10 million people are newly infected annually

Hep B & C can lead to severe disease and possibly death

Hep B & C is spread by blood, semen and other body fluids

ኢልቅረቦ ንዐልሞም። ለገብእት ዐምሳት እትሊ ወቅት እሊ ምስል መርመረ ኤቶ ኣይ ሺ መርመረ ናይ ሰፊር ወብዕድ እብ ጅመዕ ለለዐዳ ሕማማት ገብእ እሊ ሀለ። ሰፊር ቢ ጸንሐ እት

ምን ለኣምራመ ደወ ኣለበ እንዴ ልትባህል እት ትክሳት ወእግለ ኩብደት ዝያድ ለሰምም ኣድውየት ዐድ ንሰኣት እግል ሕሙም ዐዛቡ ወሰክ ወዕምሩ እግል ለኣትሻፍግ ክም ቀድር ኢንትረስዕ።

ሐቲ እግል ንፍቀደ ለብነ ኣጀኒትነ ክታብት ሰፊር ሰነት እንዴ ኢለኣደውሮ ነስኣ ሰበት ሀለው እብ መላርዮት ልግበእ ወብዕድ ኣሰባብ ነፍሶም እንዴ ደዕፈት ገኖብቶም ሕብረ እት ቤጪ ገይሰ ዶል እንረኤ ለነኣታክሶም ሐዳም ኢሀሌን። እሊ ላኪን እግል ኣጀኒት እትሊ ኣክ ድዕፍ ደም ወእብ ሕዳን መኑት ለመጽእ ሕማማት ወድዮም ሀለ። እሊ መስል ጅነ ኣጊድ ዲብ ሐኪም እግል ንንሰኡ ሌጣቲ ለወጅብነ።

ኣሻይር ሰፊር እብ ዓመት ወሄፓታይትስ ቢ እብ ፍንቱይ

እት ሰልፋ ኣሻይር እግል ኢለኣርኤ ቀድር፡ እብ ፍንቱይ ዲብ ኣጀኒት ፈተር ተዐብ ፈዳብ፡ መትባላል፡ ሐዝ (ድቁብ ኢኮን) ሐቆሁ ገኖብት ወጸዕደ ክፈል ናይ ዕንታት ቤጪ ገብእ (jaundice)

ሸን ማይ ሕብረ ልትብደል - ክዕስ ቡን ትመሰል ሸን ከደን ሐመሸገናይት (ጨብላይት) ትገብእ

ዝያድ እንትበህ ለልሐቡ እብ ጅመዕ ለለዐዳ ሕማም ራክቦም ለጸንሐ ሰፊር ቢ እግል ኢለሀሌ እቶም መርመረ እግል ሊደው ልትመከር

ሸሪክ ሐያት ኣው ሸሪክት ሐያት ኣውመ ጅንሰ ለማርሶ ስብ መቅሬሕ ምሮቶም ሀለ እቲ ምንገብእ ለካልእመ እግል ልትመርመር ሀለ እሉ ክምሰልሁመ ጠበዕት ሸቅሎም

ምስል ደም ለትራክቦም ክም ላባራቶሪ ቴክኒሻናት፡ እሞልዳት . . . ለሕማም እግል ልዕዳ እቶም ቅልዓም ሰበት ቶም ለተሸክቦም ኣለት ዶል ትሳድፎም እንዴ ትመርመረው ኣለቶም እግል ለኣምሮ ወደዋሆም እግል ልንሰኡ ሰነቲ። መትኣካር ወመትሃማል እግል ለሀሌ ኣለብ።

ደወ ደዋሁ ክምለ ናይ ኤቶ ኣይ ሺ ለሻይረስ ክም ኢበዘሕ ለወዳ ኣድውየትቲ ለልትነሰእ። እትለን ሐልፈዩ ሰኔታት እብ ገብእ ድራሳት ሄፓታይትስ ሲ ሰኔ ሐድ ሰበት ጸንሐ ሕክምናሁ ዲብ ሐሊበት ወኣሮተ ሌጠ ሀለ። ሄፓታይትስ ቢ ላኪን እት ግብለት በሐር ቀዩሕ 17 ምእታይት፡ እት ቅብለት/ብ/ቀ 8.9 ምእታይት ወእብ ደረጃት ወጠን 12 ምእታይት ሰበት ሀለ። ክምለ እግል ጋብሆት ኤቶ ኣይሺ ለገብእ ሸቅል እግል ልትሸቂ እንቡት ሀለ። ሸቃላ ዓፍየት እንዴ ተዐለመው ለለዐልሞም ተእሂል ተሀየበው ወለናይ ኣፍዝየት ሸቅል እንቡት ሀለ። ዲብ ክለን ኣቃሊም ለሀለዩ ዐባዩ እስብዳልያት ሀዩ ደዋሁ ጸብጣት ሀለዩ።

መዳፊዕት እት ነዳፊት ነፍሰክ፡ እደይክ፡ ድዋርክ፡ ብለዕነ ወሲቶን ንኣፍዝዩ። ሸቃቅ ንትነፊዕ ወእብ ነዳፊት ንጸበፍ።

ኣጀኒትነ ክታብቶም እብ ተማሙ ክም ነስኣ ኒዴ።

ምን ጅመዕ ጥሉቅ ንትሰለም። እብል ለትዘከረ ኣሻይር ዶል እንሸዕር ኣጊድ ዲብ ሐኪም ኒጊሱ።

ደዋነ እብ ንዛም እት ወቅቲ ወዋጅብ ቅያሱ ንንሰእ።

እት ዴራይ ዓዳት ክም ከረ ትክሳት ወሳሪ ማሪ ውቀትነ ኢነኣብዴ፡ ኣጊድ ሐቆ ትዳዌ ኣጊድ ተሐዩ።



አሳር ወ ሲያሐት ወመናፍዕተ



እት ፍንጌ ክልኢቱ ለቀላቅሎታት ለልትረከብ አውለት፡ ምስለ ቀላቅሎታት ለለአትሓዱዱ ዐበዩ አድብር ወ ሐሲያት ሰበት ህለው፡ እግለ አድብር እግል ልዕረጎ ለለትኸቶ ሲያሐዩን፡ ንዮቶም እግል ለአትምም እሎም ለቀድር ቱ።

አውለት ብዙሕ አዝረአት እግል ለአብቅል ለቀድር አርድ፡ ወ አዳም እግል ልምበሩ ለቀድር ውጡይ ሰበት ቱ፡ እግል ሲያሐዩን ወ ባሕሲን፡ ከም ናይ ዕርፍ ወ መበገሲ አሰክ ብዕድ አካናት እግል ልግበእ ቀድር።

ለምን አሰመራ 100 ኪሎ ምትር ራይም እንቱ ለልትረከብ፡ ግንራራብ በሐር ቀደሕ ሰኔ ጋምል ወ ዳለ ሌጣ እንዴ ኢጉበእ፡ እብ መካሪቱ እግል ሲያሐዩን ዝያድ ለለአትዐጅብ ወለ ለአትናይት ናይ ጠቢዐት ርዝቅ ቱ።

ለትወቀለ ግብለታይ ምፍጋር ጸሓይ፡ አጥራፍ እምባሌራ፡ መጠራ፡ ቆሐይቶ፡ ደብር ከሸዐት ወ ብዕድ እብላ ትፈናተው አድብር ወ አጸድፍ ግሩም እት እንቱ ልትረከብ። እሊ ህዩ እት ግንራራብ በሐር ለከሬ ሰበት ቱ፡ እባ ለልትረከብ እቱ አሳር ታእሪክ፡ ሰብ ብሐሳት ወ ሲያሐዩን ዝያድ ልብ ለከሩ እቱ ወለ ልትኸቶ አማክን ቱ።

ምን ራስ ቁሳር አሰክ ራስ ድሚራ፡ 1200 ኪሎ ምትር ሪም ለበ በሐርን፡ ምን ካልእ ኡብሐር ለኢጃግለበት ሰበት ታ፡ እግል በሐስ ዕሉም፡ መትፋግዒ፡ ተጃረት አወለይት ለልትኸቶ በሐር ጋብአት ህሌት። እምበል እሊማ፡ 354 ዐበዩ ወ ናእሽ ጀዘራት እበ ለበን ቱ፡ ግሩም ዕንባ በሐር

(coral reefs)፡ ጽሩይ ማይ፡ ሉል(pearls)፡ ወድዕ(shells)፡ ሶታይ ዐላል በሐር(algae) ወ ብዕድ ለሰርገዩ ሰበት ተን፡ እግል ረእየተን ለለአትናይት ዝሕረት ወጠን ተን።

እትለ በሐር እሊ፡ አሰክ 1,000 ለጉበእ ለትፈናተው አጅናሰ ዓሳታት እብ ህለዮቶም፡ እግል ብዙሕ ድራሳት ለለአትናይቶ፡ አጅናሶም ወ መናፍዕቶም ለተአመረው ወለ ኢተአመረው፡ ናእሽ መኸሉቃት በሐር ወ አትክል(sea Weeds) እብ ብዝሐ ህለዮቶም፡ ተአምርታ ድሕረትና ወ ድሕረት በሐር ቀደሕ ለለአክድ ሰእየት ለለህይብ ርዝቅ ወጠን ቱ።

እታ እብ ከተክት ለትሰርገዩ ጀዛይር ወ ባዶብ ግንራራብ በሐር፡ ረእየተን ለተአተፈክር አራባት፡ እብ ብዝሐን ወ ሐባረን ለለአትፈክሩ፡ እት ብዕድ አካናት ለኢልትረከቶ ሰራይር፡ እብ ጽዕዲናሁ ወ ነዳፈቱ ለለአትናይት ሐዳ፡ ክምስለ ካልእ ኡብሐር መሻክል ለኢአለቡ፡ ደረጀት ቆሪናሁ እበ ኢልትአመረ ከ እብ ሐድሐድ እንዴ ወሰክ ለገይሱ፡ ጽሩይ ማይ በሐር እግል ናይ ቀበት ዐድ ወ ካርጅ ሲያሐዩን ለለአትናይት ረእየት ቡ።

በሐርን ለኢተምተመት ሰበት ታ፡ እግል ልትፋግዩ ለመጽኦ ሌጣ እንዴ ኢጉበእ፡ ዝያድ ጽራት ወ እብ ቀሊሉ እግል ተትርኢክ ለትቀድር ለትፈናታ ቆሪን ለቡ ማየ ራሐት ለቡ፡ ዲብ ቀበት በሐር እግል ትትሐጽብ ለለአትናይት ሰበት ቱ፡ ክምስል መርከዝ ታእሂል ሕማሴ እንዴ ጉበአት፡ እግል ትፈናተው ዲብ

ናይ በሐር መኸሉቃት ድራሳት እግል ሊደው ለለሐዙ ምኡምረት፡ ጠዕም ወ ለዘት በሐር እግል ለአዳውሮ ለለሐዙ መሐምሰት ለልሰሐብ ቱ።እምበል እሊ ማ፡ እት ዓለም እንዴ ልውሕዶ እብ ጊሰቶም ሸቃል ካልቃም ለህለው ዐበዩ ዓሳታት በሐር፡ ክም ከረ አቡሰላማ፡ እሩም(cow fish)፡ ? እት በሐርን እብ ካሬ ዕልብ እብ ህለዮቶም እግል ኖሱ ዐቢ ርዝቅ ቱ።

ግንራራብ በሐር ቀደሕ ክልኤ ዐበዩ ሚናት ለሸቀየ እቱ፡ ቆሪን ለቡ ማይ ሰበት ብዲቡ፡ ክምስልሁም እግል ናይ ዐድ ወካርጅ ሲያሐዩን እግል ልጅልቦ ለለአትናይት ብዙሕ መርሳታት ሰበት ህሊ፡ ውበዕድ እግል ሲያሐት ለለአትናይት ሚዘት ቡ።

ምን ግንራራብ በሐር እታ ይቡስ ምድር እንዴ ትረይም

እንሰ ተዋበ ናይ ደህ ክምቱ ወኢዜ ምን አዳም ህዩ እት ሸረፍ ክም ትበዝሕ እት ልብል እድራስ ወድ ሻውር ሐባባይ እለ ሐለ

ድርሆይት ወኢነ ኮይ እምቤ ወከረፍ ሐ እንትልና ተ ወእንሰ እት ደህ ወእት ሸረፍ ሐሪመተ እንጨንግዕ ወኢነህይብ እብ ክለፍ ሰብርተ እንተንትን ነትላቅመ እብ ዕረፍ ክራዩህ ንትከበት ከሐራፋብን ልትቀረፍ ምንዲ ትመጽእ እት ምዕጥን አድማይ ጸርነ ንሰለፍ

ሐቀመ ትገይሱ፡ እት ብዕድ አካናት እብ ቀሊል ለኢልትረከቦ ሐዋናት ከደን፡ ክም-ከረ ሰገን፡ አድግ ከደን፡ አራባት ውበዕድ ሰበት ህለው፡ እግል አርዛቅ ጠቢዐትን እንዴ ኢትጸግብ ምን አሰክ አውለት ትፈግር።

ምን አውለት ለልትከረው መሓዛት ፊጋሌ፡ መሓዝ ሐዳሴ ለብክ ወ ዒን መ መሳፍሪን ለረይሐ፡ እብል ለአትዐጅቦ አጸድፍ ለደነው፡ አሰክ አውለት ለለአራግሮ ናይ ጠቢዐት ጸረጊት ቶም።

ዲብ እሊ አርድ እሊ ምን ጠረፍ ኡብድርባቡ ቅብለት ምን ማርሰ ግልቡብ አሰክ ሐር ዙሉ ለትመደደ ናይ ጠቢዐት ሕፋን ንቃዕ ክምስል ሐኑብ፡ ማይ ወዑይ፡ ዋዓ ብእቶም። ለእብ ማይ ወዑይ ለልትአመር፡ ማይ ዓፍየት መሰለን ናይ ሳረዮት ጠቢዐት ቡ እንዴ ትብህለ ሰበት ልትአመን፡ ምን ቀበት ዐድ ወካርጅ ብዝሓም ቤጽሐት ቱ ለልትሐደር። እብ መርዒት ወ ጥውር አግቡይ አትሳናይ ምን ጉበእ እሉ ላታ ናይ ቤጽሐት መርከዝ እግል ልግበእ በክት ዐቢ ህለ እሉ።

ለምስል ወምተሐት 500 ምትር ምን ጠፋሐት በሐር ምዱድ ለህለ ናይ ምፍጋር ጸሓይ ጋድሞታት እበትረከው ምናታ ምስጢሮም ወህለዮቶም ለኢተአከደ መዓድን ወለለትዐጅብ ናይ ብርክናት አሰር ምን ዳይም መድህር ወተሐት ለደህረ አካናት ክምስልሁም ናይ መዓድን ወናይ ጠቢዐት ጋዝ ወክዙን ርዝቅ፡ ለትቀበረ ሐዳራት ወታሪክ ሰበት ቡ አርኪዮለጂ ወ ጂኦላጂ ብሐሳት ለለዐዝም ወእግል ትብጸሐም ለለአትናይቶ ሰበትቶም ቤጽሐት አሰክ እሊ ድዋራት እሊ እብ ትሉሉይ ልጅርበቡ።

እሊ ናይ ርዝቅ ጠቢዐትና ምን ቅሩብ እግል ሲያሐት ወዝያድ ክሉ ህዩ እግል ወጠን ዐቦት ወተጠውር እግል ለአምጽእ ምን ምህም ምንማቱ፡ ዲብ አግቡይ መትነፊታቱ ወክድመቱ እግል ጠውሮቱ ጅህድ ሙዋጥኒን ሰበት ጠልብ ክሉ ሙዋጥን እሊ እንዴ ፈህመ እግል ዐቦት እሊ ርዝቅ ጠቢዐትን እግል ልጸገም ለአስትህል። ሲያሐት ዐድነ ሻፍግ ወነዲፍ ተጠውር እግል ለአምጽእ ዝያደ ሕኩመት እግል ትጀህት እግሉ ህዩ ወጅብቱ።



ሸባብ



“በገለ ሐቆ ወዳክ እት እዚን ለኢትትበጸሕ ሓጀት ይህሉት”

ዐሊ ዑብደለ አድም

ዐሊ ዑብደለ አድም ልትበሀል። እሊ ምን ለእብ ሐርሰ ወርዕዮ ለትትናበር ዓይለት እት ጃኒ ለትወልደ ሻብ። ኣዜ ደረሳይ ሓምሰይት ሰነት እት ኩልየት ሕክምን ወዕሉም ዓፍየት ኦሮታ ቱ። እት ሳወ 4 ንቅጠት ለአምጸኢ። ሻብ ዐሊ ዑብደለ። እት ኩልየት ማይ ነፍሐመ ደግመየ። እሊ ለእብ አደቡ። ልባቡ ወፍድብናህ መሰል ሰኔት እግል ሸባብ ላቱ ደረሳይ እግል ዮም ጋሻይነ ሀሊ። ምሰሉ ለወዳናህ መቃበለት ትተላሌ።

ሰአል፡ ዐሊ ምሰል ነፍክ እግል ተኣትኣምረኩ ዐሊ ምንቱ? እት ኣያ ዐባ? ወከልፍየት ሓይትክ ከኣፎ ትመሰል?

በሊሴ፡ አወል እግል ለሀብኩኒቱ በከት እንዴ ሓምድ፡ ኣነ ዐሊ ዑብደለ አድም እት በሀል እት ምዴርየት አሰማጥ፡ እት ዓሕየት አክዋር ሰነት 1997፡ ትወለድኩ። ምኑ እት እት ጀፈርነ ለዐለት መድረሰት እት ሰነት 2003 አወላይ ፈሰል እት ሸጋሊ መአንብታይት መድረሰት አንበትኩ። ወምኑ እግል ምግባይት መድረሰቼ አተላሌ እት መድረሰት ጃኒ ግሰኩ።

ሰአል፡ ምን መድረሰት ሸጋሊ ኣሰክ መድረሰት ጃኒ ለቀየርካ ቡ ሰብብ ሚቱ? ወዋልዴንክ እት መድረሰት ንዮቶም ከኣፎ ትመሰል?
በሊሴ፡ ኣነ ምን ዓይለትኩ ወድ

ሕዱግ ሰሌማን

ሕደጋት እዴ እት እንብእ፡ መናበረት ወሐዶት ዓይለትነ እት ሐርሰ ወርዕዮ ትትንኩብ። እት ወቅት ለሀይ ምንዩ ለለዐቡ ሐውዬ፡ እት መድረሰት ፈዳይብ ዐለው፡ ወአናመ ምሰሉም እግል እግበእ እንዴ ቤለው፡ ቀደም ዕምርዬ እግል ድራሰት ተምም እብ ሐቱ ሰነት ቱ መድረሰት ለአተውኒ። ለመድረሰት ለቀየርካ እቡ ሰብብ፡ እምዬ እብ ሰብብ ሸቅል እት ምዴርየት አሰማጥ አሰነዳቱ ለዐለት ወአቡዬ አጅል ሐርሰ ወርዕዮ፡ እት አክዋር ዐሊ። ሰበት እሊ፡ ምግባይት ደረጃት ምሰል እምዬ እግል እድረሰ ቱ፡ ኣሰነደ ለቀየርካ። ክምሰልሁመ እት ሸጋሊ፡ ሰኒ ሐምቅ ዐልኮ ወመድረሰት ጃኒ ምነ ትሩዳት መዳርሰ ናይ ምዴርየትነ ሰበት ዐለት፡ እምዬ ኣሰክ ክም እትቀየር ወዴት።

ሰአል፡ ጀነራል ከኣፎ ዐለ ወከም ኣምጸኣክ?

ጀነራል ክም ምራጄ ገብኣ እግልዬ። 92 ምን ምእት እንዴ ኣምጸኣኮ ኣሰክ ካልኣይት ደረጃት ምሀር ሐለፍኩ።

ሰአል፡ ካልኣይ ደረጃት ምሀር ከኣፎ ዐለት ወእተዩ ደረሰክ?

ካልኣይት ደረጃት ምሀር እት መድረሰት ቦርዲን አሰማጥ ደረሰኩ። ወዲብ ምግባይት ወካልኣይት ደረጃት ምሀር፡ ቅድረቼ እት

ትትረድ ጌሰት ወሐዬ ምዕባዬ እብ ሐቱ ፈሰል ሓልፍዬ ሰበት ዐሊ፡ እግል እፈድብ፡ ብዙሕ ሳዕዴኒ። ወንትጃገር ሰበት ዐልኩ፡ ብዙሕ ሰዴተኒ። እት ማይ ነፍሐ፡ ኮምፒተር ኣፕሊኬሽን ከለሰ ወእብ ዲፕሎመ ደሐረ። ኣዜ እት ነቅፈ መድረሰት ወግሬት ለኣደርሰ ሀሊ።

ሰአል፡ መዳሊትክ እግል ሳወ ከኣፎ ዐለ?

በሊሴ፡ መዳሊቼ እግል ሳወ ምን ታሰዓይ አንበትኩ፡ ወዲብ ትሰዓይ ዩኒት በሀለት ምነ ለዐለው ሰሰ ፈሰል፡ አወላይ ፈገርኩ። እት ክምሰልሁመ እት ወቅት ከረም፡ ምን እት ኣሰነደ እመጽኢ፡ እት መድረሰቼ እግል እፈድብ እምበል፡ እት እምዬ ለትሸቅዩ ዐለት ሸቅል ዝቤ ወመትዛባይ ብዙሕ ተረት የዐለት እግልዬ፡ ወእምዬመ እት መድረሰቼ እግል እፈድብ ሌጣቱ ላሊ ወአምዕል ትመክረኒ ለዐለት። ወእብሊ ሰብብ እሊ እት ዓሰራይ ወዐሰር ሐቱ፡ ሰኔት ፍገራት እንዴ ኣምጸኮ ኣሰክ ሳዋ ትበገሰኩ።

ሰአል፡ መድረሰት እት ሳወ ከኣፎ ዐለት ወእት ማትሪክ ከም ኣምጸኣክ?

በሊሴ፡ እት ሳወ ለትፈናተ ጠባይሱ፡ ቅድረት፡ አምር፡ ዓዳት ወለመድ ለቦም ሸባብ ምሰል ሰበት ትትበር ብዙሕ ዕልም ትከሰብ። ምሰል ክሉ ላኪን መብጽሕክ እንዴ ኣመርክ እግል ትሸቁ ብክ ወወቅትመ ሰኒ ሕዱድ ሰበት ገበኣ፡ ወቅትክ ከኣፎ ትትንፈሶ ኣመርት ምህምቱ።



ሰአል፡ እት ሳወ ምሰል ክሉ ለትዘከረ ምን ተሀሌ?

እት ሳወ ምሰል ክሉ ወክል ዶል ለኢትዘከረ ምን ተሀሌ፡ እት ሳወ እንዴ ተኣቱ ወትፈግር ለሀሌት ናይ ጃምዓት አሰመረ ታቢለት ወ“ምስተቅበልነ ነኣክድ” ለልብል ክቱብ ዲመ ምን ፍክርዬ ባድያት ኢለአምረ ወሰክ ኣዜ እትዘከረኒ። ወበክቼ እንዴ ሰነ፡ አልሐምድለ፡ በጽሐኩው። እት ክምሰልሁመ እት፡ ናይ ጀርቤ እምተሓን እት ሳወ አወላይ ምን ብሎክነ ፋግር ሰበት ዐልኩ፡ መረ ሰአየት ሰኔት ዐለት እግልዬ ወኤማንዬመ ውቁል ዐሊ።

ሰአል፡ ቀደም ኩልየት ሕክምን ወዕሉም ዓፍየት ኦሮቱ፡ ተኣቱ እት ማይ ነፍሐ ሰነት ዋድያም ዐልክም፡ ፍገራትክ ከኣፎ ዐለት?

በሊሴ፡ እት ክልኢቱ ሰር ሰነት አርበዕ አርበዕ ኣምጸኩ። ብዙሕ ካድም ወጀህድ ለሐዜ። ወክሉም እብ ኣዜ እት ኩልየት ለለኣቱ፡ ሸባብ እንዴ ኢልትሀመሎ እብ ክለ ቅድረቶም እንዴ ሸቀው ምራዶም እግል ልብጸሐ እትፋኒ።

ሰአል፡ እግልሚ ዕልም ዓም ደክተረት ሐሬክ?

በሊሴ፡ እብ ነፍሼ ወምን በዲርዬ ሐኪም ሌጤ፡ እግል እግበእ ሐዜ ዐልኩ።

ሰአል፡ እት ዕልም ዕሙይ ሕክምን እግል ትኣቱ ተኣሲር ለወደ እትክ ነፈር ህለ ገብኢ?

በሊሴ፡ ላላእ ኣለበ፡ እሊ ሕሻል ነፍሼ፡ ናሼ ሌጣቱ ለእዋልዬ። ሰሓቅ....

ሰአል፡ ኣዜ ክልኤ ሰነት ታርፋትክ ህልየ እግል ትትከረጅ፡ ሐቆ ኣትመምኩ እት አዩ ዕልም እግል ትትፈንጉ ቱ?

በሊሴ፡ እት ናይ ከርሰ ሕማማት።

ሰአል፡ ከሕናመ ምራድክ እግል ልትመም ኣክ እት ንተምኔ እግል እት ረዩም ብሩር ልግበእ መመዳይን ለልትረከቡ ሐውክ ወሐዋትኩ ምንክ ለልንእሾ ወሰናትኩ ሚ ምክር እግል ተሓልፍ እቶም ተሐዘ?

በሊሴ፡ ኣነ እግል ኢበለ ለሐዜ ምን ተሀሌ፡ እግል መሰል እዬ ሐቆ

ረኤኩ፡ ኣነ አወል ሐምቅ ዐልኮ ወሐር ፈድብኩ፡ ከሰበት እሊ ክል ሻብ፡ ሐቆ ትበገሰ ወከድመ ክሉ ክም ነጃሕ እግል ኣክድ እግሎም ሐዜ።

ሰአል፡ እት እድንዩ እግል ትትበጸሕ ለኢትትቀደር ሓጀት ህሌት ትብል?

በሊሴ፡ ሰሓቅ... ክሉ እት ሐንቴ ረቢ ቱ፡ ወሰቡብ ሐቆ ወዳክ ለኢትትበጸሕ ይህሌት። ሐቆ ከደምክ ወጀህድኩ፡ ለምራድካመ ምን ኢትበጸሕ እት ደዋይሐ በጸሕ ኢተርፈኩ።

ሰአል፡ እትሊ ለህሌነ እቱ ወቅት ብዝሓም ሸባን ደረሰ አፍላም፡ ኮሚዲታት፡ እንተርኔት፡ ተለፍዝዮናት ውበዕድ እት ታብዖ ወቅቶም እብ ግምሽ እት ለኣቡዱ ልትረኣው ወእት መድረሰት እት ለሐምቅ ህለው፡ ሚ ምክር ተሀይሶም?

በሊሴ፡ ኣይወ፡ እሊ ናይ ምጅትመዕ መሻክል ቱ። ወክልነ እግል ንጋብሁ ወጅብ። እሊ ክሉ ለሰሚናህ እኩይቱ እንዴ ኢገብኢ፡ እብ ዋጅብ ሐቆ ኢትነፈዐነ እብ መደረቱ ዐባይ ክምተ እግል ነኣምር ወጅብ።

ሰአል፡ እግል ኣዜ ኩልየት ለለኣቱ ሸባብ ሚ ምክር ተሀይሶ?

በሊሴ፡ እግል ኢበለ ለሐዜ፡ ሐቱ ኩልየት ኣቱክ በሀለት ክሉ ኣትመምክ በሀለት ኢኮን፡ ጀዲድ ንዳል ወካድም፡ ወእት ክምሰልሁመ ሐዲሰ አግቡይ ሕፍዝ እት ጀርቦ እግል ልክደም እትፋኒ ወእግል ልትሀመሎ ኣለቦም።

ሰአል፡ እት ኣክር እግል ቲብለ ለተሐዘ ምን ተሀሌ?

በሊሴ፡ እግል እብ አደብ ወተርብየት ክም ዐቤ ለወድው ዋልዴንዬ እግል ሐምድ እፈቱ። እት ክምሰልሁመ እግል ክሉም ሐውዬ ወሐዋቼ፡ መሳቲቼ፡ ውላድ መድረሰቼ፡ መትዓቢቼ ሐምድ። ወእብ ፍንቱይ እግል እንጃነር መሐመድ ሐሰን ሰሌማን ምን ኩልየት ዕልም በሐር፡ ክሉም ምደርሰንዬ፡ እብ ሰደይትኩምቱ እትለ ለበጸሐኩ፡ ሹክረን ሐምዴዬ ትበጸሐኩም እብሎም።

ወሹክረን እግልኩም።

እብ መዳበር ወመን ሽባባት ወደገሰ ሴይቲፍ ለትትዳሌ ሰጅሐት

ልግብ

ዎሮት እት ናይ “ዜን” መድረሰት (እብ ናይ ቡድህ ዲን እት ነፍሲያት ሰዓይት ለለሀይብ ዕልም ለተአደርሰ መድረሰት) ደርሰ ለዐለ ደረሳይ፡ እተ ምደርሱ እንዴ ቀርቦ ክምእነ እት ልብል ትሰእለዩ፡ ‘ኡሰታዜ፡ ኣነ ክሉ ረኣሼ እግል እትመለክ እተ ለይእቀድር ጠቢዐት ህሌት እግልዬ፡ እንዴ ኢልትአመረኒ ሐቲ ዶል ወእብ ጋሪት ሐምቀት እብ ሓሩቀት እግል እንቀዕ ሐዜ። ረቢ ልባርከከ ገበይ ለምን እለ ጠቢዐት እለ እት ባለሕ እበ ኣሰከ ምርሐኒ፡ ወገሌ ሰዴኒ” ቤለዩ።

ለምደርሰ ህዩ፡ “ኣሃ፡ ከእንተ ገሌ ሰኒ ግውኑይ ላቱ ጋር ህለ ጎርከ በህለት ቱ” ቤለዩ ወእተ ዶሉ፡ “የለ ኣርኤኒቱ” እት ልብል ደግመዩ።

ለደረሳይ ህዩ፡ “ኣዜ ኣዜታይ!? ኣዜ እግል ኣርኤኒቱ ይእቀድር” ቤለዩ።

ለምደርሰ ህዩ፡ “ኣፎቱ?” እት ልብል ትሰእለዩ።

ህቱ ህዩ፡ “ለጋር ኣመተ ኣለቡቱ ለጽብጠኒ” ቤለዩ።

ለኡሰታዝ ህዩ፡ “ኣሃ፡ ከእለ ምን ገብእ ህቱ ምነ ናይ ኣማን ጠባዩዕከ ኢኮን በህለት ቱ፡ ህቱ ናይከ ምን ለዐሌ፡ ኣዜ ኣዜታይ እት እንቱ እግል ተአርኤኒቱ ወቀደርከ ዐልኩ። ከእግል ሚቱ እነተ፡ ናይከ ለኢኮን ካሪት፡ እዲናከ እግል ተሐምርክ እትከ በክት ለተህይበ?” ቤለዩ።

ለደረሳይ ሐቆ እለ፡ እትለ ገብእ ወቅት፡ ለጠቢዐቱ እንዴ ተሐሰሲ እቱ ወእብ ሐሩቀት እት ነድድ እትለ ልሽዐር እቱ እዋን፡ እግለ ናይ ምድረሱ ሂጋ እንዴ ትፋቀድ፡ ለጋሪት እንዴ ኢትትሐክም እቱ ክም ለሀውነ ወለአወልዋ ምነ ልትጻገም ዐለ።

ወእብላሁ ሐቆ ወቅት፡ ምን ሐሩቀት እት ለኣረይም ወእት ረውግ ወምን ምዕል እት ምዕል በዐል መፈተይ ኣደብ ወበዐል ዐቅል ዛይድ እት ገብእ መጽኢ።

ተርጀመት መሰል

“ሰከይ ሓዋር ሕላሌ ቱ፡ ወክለእ ጸጋይ ኢረኪብ።”

ሓዋር፡ ተዩልል ለእለ ትኬለም ምን ልትኬለም፡ ራሐቱ ዲ ኢለኣርኤከ ተ። ምን ኣመራ፡ ልትሐለል ከሐለቱ ትከርዑ እንዴኮን፡ ሰከይዲ ኢልትዋየን እለ። ወጸጋይመ እተ ክምሰልሁ፡ እንዴ ሰእነ ለእለ ለሀይብ ትትቀዌ እቱ፡ ወእዴሁ እንዴ ገርቦ እግል ለሀብ ለኢለኣቤ እተ ሓለት ትገብእ እቱ እንዴኢኮን፡ ተሐድ ወትብዘሕ እት እዴሁ ገሌታይ ዲብ ቡ፡ ሐራም እቱተ እለ ጠሚዕ ኣለቡ።

ከምመሰላይ ጠቢዐት ጸጋይ ኣክል ሕድ እግል ለኣድምቅ እግልን ምን ሐዛቱ “ሰከይ ሓዋር ሕላሌ ቱ፡ ወክለእ ጸጋይ ኢረኪብ።” ልብለን ለህለ።

በህል እመራም

- ምን ክትርለ ሐዘን ዕንታትከ እቅመጭ ኢተአተላልዩ፡ ምን ኣመረ ፈርሐት ሽብብ ኣበለት ምን ገብእ እንዴ ኢትርእየ ኢትሕለፈኩ።” (መሃትመ ጋንዲ)
- ክሉ ረኣሱ ለኢቀልዋ ነፈር እግል ትግበእ ኢትጃርብ፡ እለ ምስተሐል ጋር ቱ፡ ምን ቀለጡ ለደርሰ ነፈር ግበእ፡ ፍድብነ ህዩ ህቱ ሌጣ ቱ።” (ለኢት ኣመረ)
- “ምን ክለ ከብድክ እግል ትትሰሐቅ ገብኣከ ምን ገብእ፡ እት ሰልፍ ለእከ ትከሰሰ መጢጠት ከፎ ክም ትትዓመል ምስለ ወእብ ከፎ ክም ትተልሄ እበ እግል ትትዐለም ብእትኩ።” (ቻርለ ቻብሊን)

ጠዓም

ሕግላን ለመጽእ እበ ምስምሰ፡ መትካያል ወመትዋሳፍ ዶል ልትዐደም ቱ፡ ብዝሓም ኣንፋር ህለው እግለ ብዝሕት ትጃረት ለመሰል እቶም ጋራት እት ለኣክቦ ነብር፡ ምናተ እለ ለእሉ ጀምሮ ህለው ማሎም ክምቱ ኢለኣምሮ ወእብ ከፎ ገበይ እግል ልትመትዖ እቡ ወልትነፍዖ ምኑመ ኢልፍህም፡ እለ ህዩ ህቶም ሐላት መትዋሳፍ ወመትካያል ሰበት ኣለቦም ቱ።

ዝበድ ዘየታት

ክል ምኒነ ከእብ ክሰሱ ለልትበህል ክሉ ሰምዑ ኣውመ ለኣምሩ ምን ለዐሌ፡ ዎሮትናመ ምስል መልህዩ ለልትሃጌ ወተሐገለ።

ደለ እለ ቀርኣከ እግል ትትፋቀድ ለሰዴከ ዐጃይብ ነሳዬሕ

ብዝሓም ምን ምሽክለት መትረሰዕ ለሸኩ ህለው፡ ወካሰተን ህዩ እት ወቅት ሰነት ድራሰት ብዙሕ መዕሉማት እግል ልሕፈዞ ለለሐዙ ደረሰ። ከደለ እለ ቀርኣከ እግል ትትፋቀድ ሰዓይት እግል ተህበኩ፡ ብዚኔስ እንሳይደር ለትትበህል ናይ ኣምሪክ ጀሪደት እለ ተሌ ነሳዬሕ ወቀሊል ብሰር ወፈንያት ናሽረት ዐለት፡ ከምን እንገርእዩ ሚ ከሬ ምኒነ፡

ሐደዶት ህደፍ፡ እት ሰልፍ ክሉ፡ ለቅራኣት እግል ሚ ብገሱ እተ ክም ህሌከ እግል ትፍህም ወሀደፍ እመር እግል ትክሬ እለ ብእትኩ፡ ከእተ መውዱዕ ለህለ እግልከ መትኢያሰ ወሕዱድ ለ ህለ እግልከ ህደፍ ኣክል ሕድ ዶል ተኣምሩ፡ እለ ለጋሪት ለእለ ትቀርእ ህሌከ እንዴ ኣቀሬከ ክም ትትሸመም እተ ሰዓይት ገብእ እግልኩ፡ ወሐለትከ እት መትፋቃድለ እሎም ትቀርእ ህሌከ መዕሉማት ክም ትዛዩድ ወዴ።

ልብከ ለከሬከ እቶም ጋራት ደውኖም፡ ከሪ ልብ እግለ እት ቀርኣም ለሐለፍከ ጋራት እብ ቀላል ገበይ እግል ትለክሶም ሰዴኩ፡ ወእግለ እተ ክታብ ትቀርኣም

ለህሌከ መዕሉማት እብ ደሰርት ገበይ ክም ትፍህም ወትቀይሶም ወዴኩ፡ ወእሎም ልብ ለከሬከ እቶም መዕሉማት እት ወቅት ሓር እግል ተኣቅብሎም ቅድረት ወዴ እግልኩ።

ምስል ብዕዳም ለትወደዩ መትባዳል መዕሉማት፡ ለክታብ እት ቀርእ ለረከብካሁ መዕሉማት፡ ምስል ብዕዳም እግል ትናቅሹ ጀርብ፡ እለ ህዩ እግል ቲቂሶም ወእግል ትፍቀዶም ለህሌት እግልከ ሐለት ለኣዛይደ ወእትለ ሐሰት ደረጀት ለግርገ።

ቅራኣት እብ ክርን ውቅልት፡ እብ ክርን ድህርት ለትወደዩ ቅራኣት፡ እትለ በዝሐ ወቅት ተርኪዝ ክም ትሰእን ትወዴኩ፡ እብ ዐክሰ ናይ እለ ህዩ እብ ክርን ውቅልት ለትቀርኣ ቅራኣት ናይ መትፋቃድ ሐለትከ ክም ትፈድብ ወዴኩ።

ዳገሞት ቅራኣት፡ ለእሎም ትቀርእ ህሌከ ኣፍካር እንዴ ዐቅበልከ እቶም እግል ክልኡ ኣውመ ምን ሰለሰ ዶል ወለዐል ዶል ትደግሞም፡ እምበል ሸክ እሎም ኣፍካር እሎም እት ፈቃዲትከ ክም ለጦኣ እመር ቱ። ምናተ እለ

እግል ልግበእ፡ ለቅራኣት እግል ተኣዳውረ ወልብከ እግል ትክሬ እለ ብእትኩ።

ክታብት ምስል ቅራኣት፡ እት ወቅት ቅራኣት ኣሰክ ክታብትለ እሉ ቀርኣ ህለው ኣፍካር ለለሀርቦመ ብዝሓም ቶም፡ ከለእሉ ትቀርእ ህሌከ መዕሉማት ዲብ ወረቀት ዶል ትደውኑ፡ እለ ምክከ እግለ መዕሉማት ሰኒ እግል ልዕቀሶም ወልሕፈዞም ቅድረት ወሰኩ።

ሚ ትቀርእ ክም ህሌከ ኣክል ሕድ ኣመሮት፡ ቅራኣት እንዴ ኢተኣነብት፡ እት ሰልፍ ለእግል ትቀርኡ ሰቱት ለህሌከ መውዱዕ ኣክል ሕድ እግል ተኣምሩ ወእግል ትፍህሙ ለኣትሐዚኩ፡ እለመ እብ ቀሊል እግል ትሕፈዝ ወትጽበዋ ሰዴኩ፡ ወእግለ እሉ ትቀርእ ህሌከ መዕሉማት ክም ትቀይቡ ወእት ፈቀዲትከ ክም ተዐቅቡ ትገብእ።

ካፈሎት፡ እትለ በዝሐ ወቅት ለክታብ ዲብ ከፍፍል ወምዕራፋት ኩፋል እት እንቱ እንረክቡ፡ እንታመ እግለ ክታብ እተ ምስልከ ለናሰብ ከፈፍል ካፍሉ፡ ወእግል ትትፋቀዶም ለከፈፍል ምስል ገሌ ጋራት ኣውመ ተዩልል ኣትጽብጡ።

ዎሮት እናሰ ጋሻይ እት እንቱ ምስል ዎሮት ዐድ ትመዩ ወእብ ሰሓቅ በረቴዕ ገብእ። ሐር በዐለ ዐድ ላሊ ልቡ ምን ከራ፡ ለእናሰ እተ ቁርፈቶም እንዴ ኣተ እት ለኣትጫፍር ሰምዐዩ!!! ከከርንቱ እንዴ ወቀለ፡ የሀ ፍላን ዶል ቤለዩ፡ ህቱ ህዩ ዩይ ቤለዩ፡ ዲብላ ሳሉን ተሐት ይዐልክ? ሜት ዲብ እለ ቁርፈት ለኣፍገረተክ!!! ቤለዩ፡ ህቱ ህዩ ደርገግኮ ቤለዩ። ለበዐለ ዐድ ህዩ፡ ዐጃብት ተ እላዲ!! ኣዳም ምን ለዐል ገዱ ተሐት ክም ልትደርገግ ቅዌተ ኣለብዬ፡ እንተ ህዩ እብ ከፎቱ ምን ተሐት ገጽከ ለዐል ልትደርገግከ ዶል ቤለዩ፡ ለእናሰ ህዩ፡ ማእላተ ለተኣትሰሕቀኒ ህሌት!! ቤለዩ ልትበህል።

መዕሉመት

ዕንጽራር እምበል ረኣሱ እግል ሰቦ ኣምዕል እግል ልንበር ቀድር፡ ወሐቆ እላመ እብ ሰፍራ ቱ ለመይት።

ምን ገጽ 10 ልተላሌ

ኣሰማይ ናይለ እዳራት ደዋሒ ህዩ ምስል ታሪክ ሰውረት ወምራድ ሽዑብ ኤረትርየ ለልትጸበዋቱ። እዳረት ደዋሒ ሽዑብ፡ እዳረት ደዋሒ ሰላም፡ እዳረት ደዋሒ መስከረም፡ እዳረት ደዋሒ ሰውረ ወእዳረት ደዋሒ ፍትሒ ተን።

“ሽዑብ” ርሒብ ኣርድ ሐርሰ ለመልኩ፡ እት ወክድ ንዳል ብዙሕ መዓርክ ለገብእ እቱ፡ እብ ፍንቱይ ህዩ እት ሰነት 1988 ዝያድ 400 ኣብርያእ ሙዋዋኒን እብ ደባባት ዴሽ ደርግ እብ ተሸዕልል ገበይ ለትከዩደው እቱ፡ ከምሰልሁመ ዴሽ ሽዕቢ ተሕሪር ኤረትርየ እብ ዐመልየት ፈንቅል ወሪድ ኣባያሙ እግል ልሸነቅ ክም ኣግደ መበገሲ ለዐለ ድጌ ቱ።

“ሰላም” ለካምል ሽዑብ ዐለም ለልኣቃምተ፡ እብ ፍንቱይ ህዩ ሽዑብ ኤረትርየ እት ከደን ወመላል ለናደለ እለ ወቃሊ እስትሸሃድ ለደፍዐ እለ ቃልየት ከለመተ።

“ፍትሒ” ዐድል ሽዑብ ኤረትርየ እግለ ዐለም ለጫዌቱ ምኑ ዐድል እግል ኣከዶት እግል ዐስርታት ሰኒን ለናደለ እግሉ ወክም ኣግደ ወለኢልትቀየር ሀደፋ እንዴ ረኣዩ ለልትማገት እለቱ።

“መስከረም”እት ረኣሰለ እብ ኣክደር ፈርያት ወዕንባባታት ናይ ሰእየት ወሬሕ ግብኣቱ፡ ሽዑብ ኤረትርየ ሕቁቁ እብ ገበይ ሰላም ክም ተሐረመ፡ ሰላሕ እንዴ ጸረ ናይ ንዳል ብሸራቱ ለኣሰመዐ እቱ ወረሕ ሰምተምበር ቱ።

ልተላሌ.....



ተሰነይ እት ረክሰ ግርመት ግርመት ለወሰኑ

መዳሪያ፡ አማራ ወልደአብ ጆሪጅት “ኣዳሰ ኤርትራ” ተርጅመት ሳልሕ ገመ

እምበላ እብ ሕበር ለኑበር ሸዐቤ፡ እብ ሕፋን መትባዳል ትጃረት ተ ለትትአመር። ምን ርሕብናህ ወለዐል ናይ ክለን ቅምያት ኤረትርየ ለመድ ወዓዳት እንዴ ሓበረት እብ ለትፈናተ ሀገጊት እት ልትፋህም እብ ሕበር ለኑበር እተ፡ እም ኩሉ ለልኡብላ ብዙሕ አሻይር ለበ መዲነት ተሰነይ ተ። ለሐብብር ሸዐቤ፡ እብ ወቁር-ረስም ኩኑን ህለ። እብ ሕሰር እግለ ልትፈረጅ ህዩ፡ ክሉ ተምሳል ኤረትርየን እተ ህለ።

ሸዐቤ ምን ኩብቲ ጋሽ ሐር ለኢለሐረግግ ቲ። ለጋሻይ ምን አየ አካን ወቅምየት ክም መጻ ኢከሰሰ። እግል በዐል ደሐን ወሰላም ዲመ እደዩ ምዱድ ወወጅሁ ፍሱሰ ቲ። ክመ ኡብዕቦታትን ለአጽነሐዉ ሕሹም ዐገል ኩብቲ ጋሽ፡ እት መአሰሳት ገሃዊ ወመጣዕም ወእት ሰከን ጋሽ ሰልፍ ለመዋዉ ቲ ሸየ ለአሳሰ ሐያት ማይቲ። ምኑ ወኬንመ ጽሙእ ሐልፋይ ገበይ



እምበላ አሰፍ ጀላብ እግል ልሰቲ፡ እት ሸዋሬዕ ናይለ መዲነት ማይ ለመልኦ አድውነት (አዝያር) ህለ። ምስሉመ እት ሐብል ለትህንጦዋል ክባዩት አው ክዝ ሲቲ።

ምን መዲነት አስመረ እንክር ምውዳቅ ጸሓይ እት መሳፈት 357 ኪሎ ሜተር ለራይመት መዲነት ተሰነይ፡ እበ ርሕብ ናይ ሐርሰ መሻሬዕ ለትኬለበት ሰበት ተ። ዓም ናይ ፈዋክህ ወክዳርተ። እብ ዐቢሁ ሸዐቤ ምስል ሱዳን ምን ቅሩብ ሰበት ልትራኩብ ወአቶብያመ ረዩሙ ሰበት ኢኮን፡ ዕዳጋህ እብ ፈርያት ናይ ሰልኦሰ ደውለት ለትረዘቀት ተ። በዳዩዕ ምን ሱዳን ወአቶብያ ልትክእለል፡ ሰበት እሊ እት ዕዳገ ተሰነይ ለኢትትረኩብ ሰንዐት ኢህሉት።

እሊ እብ ንዓል ወተሐዲ፡ እብ መራነት ወእምነት ሰውረቲ ለሓልፍ ሸዐብ ተሰነይ ምን ጀራይም እስትዕማር ለትሐመለው ወውላዶም አሰክ ሰዋር ኤረትርየ ለአትባሰው ምርቲ። ንዓል ወልጁእ ለሰሕለዩ እብ ሕበር እት ልትፋህም ምስል መናበረት ከርከላሕ ልብል ትርእዩ። እት ወክድ ወራር ወያኔ

ለሃድእ ወዕሙር ለዐለ እስትቅራር ሸዐብ ተሰነይ ዐለ ክም ኢዐለ ጋብእቲ። ሙምተለካት ሸዐብ ትደመረ ወትዘመተ። ምናተ ሸዐብ እለ መዲነት እበ ጀራይም ወዘማቲ እንዴ ኢሸዕልል፡ ለዕምር ሐያቲ ምን ጀዲድ እግል ልብለሰ ወክድ ኢነሰእ ምኑ።

እትሊ ክለን ቅምያትን ለኑበራሁ አርድ፡ ምን ለትረክቡ ሸራፍ እንጊረ መትካፋል ወክድ ረዩም ለአዶረ ምስሉም ለመድቲ። ተሰነይ፡ እተ ምድረ ለሀያብ፡ ሸዐብ ጸጋይ ለኑብረ መዲነትተ። እትሊ ሸዐብ እሊ በኦሰ ወክላፍ ሳደፈ ምን ጉበእሙ፡ እብ ዕሬ እግል ልባልሕዉ ልትሳሰዐው። ሱብ ተሰነይ አከር ኢጸብጦመ ልትበህል። ሸዐብ ተሰነይ እብ ዐፎ “መዓሌሽ” እት ልብልቲ ለልሳመሕ። ለግቡእመ “ኡብሸር ማመሸክለ” ልብል ወእብሊ እብ ሕበር ነብር።

አሰማይ ነበሪት እግል ገሌ ጋሽ ወእብ ፍንቲይ ምን አውሎታት ከበሰ ለክራይ እግል ልጀድድ እቲ ቀድር። ተአሰር ናይ ሱዳን ወሂገ ዐረቢ ሰበት ጉበኦ፡ ምር ኖዕ እት እንቲ ሰሙ ክምሰል ትቀየረት

ለክልዋ ጋሻመ ኢልትሐገል። ፋል ሳይ፡ ፋል መሰላሕ፡ ፋል ግላቤ ለትፈናተ ፋል ሰኒ ምን ልሙድ ነበሪት። ላሕመ ጠወ፡ ላሕመ ሾርቤ፡ ላሕመ ፍሩም፡ ከሙንዩ፡ ዘባዲ፡ ለበን፡ በግዋስ እት ልትበህል ምን ለአክልዋመ ለልኡትፈክር ኢኮን። ክም ጅርጂር፡ ባምየት፡ ምሉኽየት፡ ሎቢን፡ ግሬን (በሃሽ) ለመሰሉ ምስል ሸዐብ ክመ ለትከለቀው፡ ምስል ክል ነብረ ህለ። ዜድ ስምስም መ እት ክል ለትቀረበት እልክ ነብረ እግል ልግበእ መሸክለት ኢኮን። አሰክ ተሰነይ ለሳፍር ህዩ፡ ምን እለ መጽእ ልምጸእ እግሉ ለገብእ ኢልሰእን። ምን ከበሰ ለዓረ ናዩ ለላምዱ ነበሪት፡ ምን ቀላቅሎታት ለትባሰን ናዩ፡ ወምን ደውለት ሱዳን ለጄራን ለመጽእመ ናዩ፡ ከዋጃመ ምን ጉበእ ሙነቲ ኢለሐግል።

ሂገ ዐረቢ እት ተሰነይ ወደዋራተ እንዴ ትለመደት፡ ዐረቢ ለኢለአምር አለቡ። ተብዐት ወአንሱ፡ ንኡሽ ወዐቢ ክሉ ልትፋህም እበ። ሀገጊት ቅምያት ኤረትርየ እግል ለአምር ለልሐዜመ ለገበይ ተሰነይተ። ከበን፡ ተሰነይ፡ ክልኤ አው



ሰልኦሰ ሂገ ወምኑ ወለዐል ክም ተሃጊነቲ መድረሰት ሀገጊት ዐድነ ለትትበህል። ሰካነ ኖሶም ሙደርሲን ወኖሶም ደረሳ ቶም። እት ተሰነይ ሂገ ዐረቢ ክም ልሙድ ትትነሰእ፡ እብሊቲ ሕኔት ፍራጅ- ተላጀት፡ ሕኔት ምውፋር -መውገፍ፡ ሕኔት ብሸክሌተ-ዐጀለት፡ ሕኔት ዐራት- ዐንገራብ ውብዕድ ልሙድ ወምን ክል ነፈር ለኢበዴቲ። እግል ጋሽ እንድኢኮን፡ እግል ሱብ ዐድ እብ ፍንቲይ ለእቲ ትወለደው ወዐበው እብ ለህጀቶም ልትአመር።

እትለ ዐድ ናይ ክለን ቅምያት ዐድነ ለትፈናተ አግቡይ ልብሰት ምን መክሰብ እለ መዲነት ቲ። እግል ሐቲ ቅምየት ለወክል አግቡይ ልብሰት ህለ መኢህለ አሰክ ለአተብል ቲ ለቲለል። ለሐቲ ቅምየት ናይለ ሐቲ ወለ ሐቲ ናይለ ብዕደት ቅምየት ለብሶ። እብ ፍንቲይ አዋልድ፡ ልውየት፡ ዕባየት፡ ቶብ ናይ ሕበር ልባሰንቲ። ጀላብዩት፡ ሰዴርየት፡ መንጠሎን እት ውላድ ተብዕንመ ናይ ሕበር ልባሰቲ።

እሊ ሸዐብ ፍቲ ዓይለት እንዲኢኮን አርድ ለጀምዐዩ ሰካን ኢመሰል። እግል ሕሙም እብ ሕበር በጽሑ፡ እግል ማይት እብ ሕበር ቀብር፡ እግል ግደዕ እብ ሕበር ሰዱ፡ መቅበረቲ እት ሐቲ አካን ሕለት ሲዲ እት ትትበህል አካን ልትቀበር። ለበዝሐ ወክድ ግናዘት አሰክ ዐደ አው ብዕድ አካን ኢትገይሰኒ። እት ተሰነይ ግናዘት ዲብ ተሐልፍ ለሳድፋ ክሉ እብ እሕትራም ቀንጽ ወእግለ

ቀደሙ ለዐለው ተሌ። መካይን ለመልኮ ህዩ እምበል ድፍዕየት ሰዳይት ወዱ።

እት ተሰነይ ጸር ወራት፡ ናይ ክሉ እንዲኮን፡ ጸር ናይ በዐለ ወራት ኢኮኒ። ክም መትሎ ዶል ህዳይ እግል መርዓዊ ወዐድ መርዓት ለከሰሰ እንዴ ኢጉብእ፡ ክሉ ሙሽተርክ እብ ሕበር እንዴ አትፋገራቲ ለልኡተሌ። እግል መርዓቲ እብ ሕበር ሳሬሕ ወልትከበት። ወረቀት ዐዘመት እግል ፍላን ወፍላንት ለትብል ሰሜት ኢትትከተብ እተ፡ ልኡክ ዐዘመት እብ ዓመት “ እብሊ ደዋሒ እሊ ወእብሎህ ሕለት ፍላን ወዘይ” እት ልትበህልቲ እብ ዓመት ለልትሸር። እበ ተሐረከ፡ ዳሰ ህዳይ ለሳደፈዩም ነብራሁ በልዕ ወዐዘመቲ ደፊዕ።

ልብ ሸዐብ ተሰነይ ክመ ፍቶሕ አርዱ ፍቶሕቲ። እብ ውቁል ልትሃጌ፡ እብ ውቁል ልትሃጀክ፡ እብ ውቁል ልትሰሕቅ፡ እብ ውቁል “እትፈደል” ልብል፡ እብ ውቁል ልትሃጌ ክለ ሂጋሁ ውቅልት ተ -ሰትር አለቡ። ምስለ ክርን ውቅል ቲ ህዩ እት ሸቅሉ ልሳሰዔ። እሊ ሸዐብ ክመ ፍቲሁ ወተዓውኑ፡ ማይ ጨሎቲ መ ሐቲቲ። አሰክ ማይ ጨሎት ለትባሰን ደያነቲ ወቅምየቲ እምበል ኢከሰሰ እት ሐቲ አካን ልትሐጸብ እት እንዳ ጋብር።

እትለ ናይ ቀላቅል መዲነት በረ እት ከደን ክም ቤቲ ለልትርኤ፡ ምን መራር ጸሓይ ለትክልቀ ሐፋነት፡ አደሐ እት ዐዝለት ወላሊ እት ከደንቲ እንዴ ሰክብ ልትባሰረ።


ሰበት እሊ እት በረ ሰክበት ክም እት ከደን ሰክበት ኢልትዐለብ እት ሰካን ተሰነይ።

ሸዐብ ተሰነይ በድሪ እንዴ ቀንጸ እት ሸቅል ዲብ ልትፈረር፡ ተሰነይ እብ ጭምብወ ውሐዋ ለትመየ ባቡር ወአዜ ሰፈሩ ለሀረሰ ትመሰል። እብ አዱግ ለልሰሐብ ካሮታት እንዴ ሀረሰ “ዐር” እት ልብል፡ ገሌሁ መኪነት እንዴ ጸብጦ፡ ገሌመ እብ ዐጀላት ገሌ ህዩ እብ አጋር እት ልሰዳ ሀደፋ ለአታምም። መጃግራይቲ ለእንዴ ኢትሸብብ እብ ጮርሐ ለትካሌሕ ጸሓይተ። እብ ፍንቲይ እት ናይ ጸሓይ አውረሐት በርህት እንዴ ኢሸብብ ዐቢ ፈደፍ እግል ለአክምል ሰዐት ሰለሰ ምን ክል ምምያዩ እንዴ ፈግረ እብ ናይ እደይ ወእብ ጠቢዒ በርህት እንዴ ትሰደ እት ክል ሀደፋ እት ልትሳዔ ልትርኤ። ጸሓይ ረሚጨተ እግል ትክዔ እት ለትአሰተብዔ እቲ ወክድ ህዩ እት አብያቲ፡ እት ዐዝለት ዕጩይ፡ እት በረንዳት፡ እት አሰዋግ እንዴ አጽለል፡ ወክድ ለአበርድ። ገሌ ህዩ ጸሓይ ክመ ኢትሸምሉ ሸቅሉ ለአተላሌ። እት ወክድ አደሐ ክሰብን ህዩ ወክድ አምሱይ እት ጽላላት ወበረንዳት እንዴ ትጀመዐው ሸሂ፡ ቡን አው ብዕድ ሰታይ እት ልትናወሎ ለልትሃጀኮ አንፋር ግርመት መዲነት ተሰነይ ቶም።

እለ ሚነት ምድር ለትትበህል መዲነት እት ሐምስ እዳረት ደዋሒ ለኑበር ሸዐብ ትከምክም።

ዲብ ገጽ 9 ልተላሌ.....





ጅግራታት ርዖደት ጀብሀት ምውዳቅ ጸሓይ ተ'መ



ምን ዮም 21 ሰብተምበር እንዴ አንበተ እግል መደት ሰለሰ ወሬሕ ገብእ ለዐለ ጅግራታት ርዖደት ጀብሀት ምውዳቅ ጸሓይ ማሌ-ለሀ ቀዳሚት እት መዲነት ባርንቶ እበ ገብአት ትልህየ ተ'መ።

እትሊ እግል 15 ውሕዳት ጀብሀት ምውዳቅ ጸሓይ ለወክለው 15 ፈሪቅ ናይ ለትፈናተ ጅንሰ ርዖደት ለአሻረክ ጅግራታት፡ እት ትልህየ ካቲመት ፈሪቅ ዱታ ናይ አጅሀዘት ጀብሀት ምውዳቅ ጸሓይ ወፈሪቅ ተሰነይ ናይ ክፈል ዴሽ 65 ተልሀው።

እት ቃይድ ዐመልየት ጀብሀት ምውዳቅ ጸሓይ ብርጋደር ጀነራል ተኽሌ ክፍላይ፡ ሓክም አቅሊም ጋሽ-በርከ አሰይድ አብረህ ገርዘ ውበዝሓም ፈተኝ ኮበሪት እግር ለሐድረወ መናሰበት፡ እት ሰልፋይ ክፋል ትልህየ ለፍረቅ 1-1 ፈግረው።

እት ካልኣይ ክፋል ትልህየ፡ አጅሀዘት ጀብሀት ለወክለ ፈሪቅ ዱታ ካልኣይ ጎል ሰበት ደግመ፡ ሀርማለ ጅግራታት ገብኡ።

እት መናሰበት ከሊመት ለአሰመዐ ቃይድ ጀብሀት ምውዳቅ ጸሓይ ብርጋደር ጀነራይ

ተኽሌ ክፍላይ፡ “እሊ ገብእ ለአወረሐ ጅግራታት እብ ጅንሱ ሰልፋይ ወለረዬሕ ዐለ። ርዖደት ወዓዳት አሳሰ ሰኒ እንዴ ጸብጠየ እግል ልትጠወረ፡ ክእነ መስል ጅግራታት እግል ልተላሌ ቲ። ለሐልፈ አውካድ ሕሰር ሽባብን እት መዳፍዐት ወጠን ክ'ሉብ ሰበት ዐለ፡ ወራታት ርዖደት ወዓዳት ክምለ ለአትሐዘ ክም ይአሳደረ፡ አዚ ላኪን መርሐሰት ዐማር ወሰላም ብጽሕት ሰበት ህሌት፡ ርዖደት ወዓዳት ህዩ ክፋል ኩሉ ለተጠውራት ሌጠ እንዴ ኢገብእ፡ እግል ዓፍየት ወውዳይ ሰንመ ሐዞቲ ውቅል ወምህም መጃል መጅተመዕ ሰበት ቲ፡ ለከሰሶም ጀሃት ሕሰር ውቁል እግል ልሆቡ ወጅብ” ቤለ።

ተፋሲል ናይለ ጅግራታት እብ መስኡል ተዕቢኣት ወሐብሬ ጀብሀት ምውዳቅ ጸሓይ ትሌንቴ ዳንኤል ዮሴፍ ልትቀደም እት ህለ፡ እሊ እግል ሳምናይ ሐሉ ገብእ ለሀለ ጅግራታት፡ ለትልህያታት ድቅብት መጃገሪት ክም ትረኡት ዲቡ እት ለሐብር፡ እብ አርበዕ ጅንሰ ርዖደት በሀለት ኮበሪት እግር፡ ፕሊሶል፡ አትሌቲክስ

ወተንሺን-ሰለሕ እብ ክልኢቶም ውላድ ወአዋልድ ለሸምል ክም ዐለ ወደሐ።

እት ጅግራታት እብ ዓመት እት ኩረት እግር አዋልድ 91፡ እት ናይ ውላድ ህዩ 272 ጎል ክም ትሰጀለ ወደሐ። እት ሰዐይመ እት ናይ ቅሩብ ነፃፋት ፍገሪት ሰኔት ክም ትሰጀለት አብረህ።

እት ደንጎበ እት ናይ ሰለሰ ወሬሕ ጅግራታት እብ ጀሚዕ ንቃዋ ፈሪቅ ዱታ ናይ አጅሀዘት አወላይ እት ልትዐወት፡ ፈሪቅ ተሰነት ናይ ክዴሽ 65 2ይ ፈግረ። 3ይ ለፈግረ ፈሪቅ ህዩ ፈሪቅ አውለ ናይ ክፈል ዴሽ 57 ቲ።

እት ኮበሪት እግር ምን አዋልድ ፈሪቅ ሲሞቲ ናይ ክፈል-ዴሽ 18 ልትዐወት እት ህለ፡ ፈሪቅ ገልዐሎ ናይ ክዴሽ 35፡ ክምሰልሁመ ፈሪቅ ሀዋሻይት ናይ ክዴሽ 28 ደርበን ፈግረየ። እትሊ ትልህያታት አዋልድ ሰቦ ጎል እንዴ ሰጀለት ኮከብ መሰጅላይት አግዋል ለትሰሚት አሚረ እብራሂም ምን ፈሪቅ ሲሞቲ እት ገብእ፡ ምን መተልህየት ውላድ ሚሮን

ዐንዶም ምን ፈሪቅ ዱታ እብ 22 ጎል ለሐሰ መተልህያይ ትበሀለ ወጀዋእዝ ፍንቱይ ነስኡው።

እት ፕሊሶል ውላድ ፈሪቅ ህላል ናይ ክፈል ዴሽ 46፡ ፈሪቅ ፈንቅል ናይ ክፈል-ዴሽ 48፡ ክምሰልሁመ ፈሪቅ ተሰነይ ናይ ክፈል-ዴሽ 65 ምን 1ይ-3ይ ፈግረው።

ምን አዋልድ እት ፕሊሶል ለትሰርገለየ ህዩ ፈሪቅ ቢሽ ናይ ክፈል-ዴሽ 23፡ ፈሪቅ ፈንቅል ናይ ክፈልዴሽ 48 ወፈሪቅ ገልዐሎ ናይ ክፈል ዴሽ 35 ቲን።

ዲብ አትሌቲክስ ምን ውላድ ፈሪቅ ተሰነይ ናይ ክፈል-ዴሽ 65፡ ፈሪቅ ሰቲት ናይ ክፈል-ዴሽ 21 ወፈሪቅ አውለ ናይ ክፈል-ዴሽ 57 ምን 1ይ-3ይ ተርቲብ ረክበው። ምን አዋልድ ህዩ፡ ፈሪቅ ሲሮሪ ክፈልዴሽ 33፡ ፈሪቅ ሰቲት ክፈልዴሽ 21፡ ክምሰልሁመ ፈሪቅ ደርማስ ምን ክፈል-ዴሽ 26 ተዐወተው።

እት ተንሺን-ሰለሕ ህዩ ፍረቅ ሰቲት፡ ሀዋሻይት ወህላል ሰልፋያም ሰለሰ እንዴ ገአው ተዐወተው።

ፈሪቅ ኤረትርዮ፡ እት ሴካፋ እግል ኬንያ ለአጀጌሕ

ሐቐ ሰነት 1994፡ ኤረትርዮ እት ጅግራታት ሴካፋ (ሲንዩር ቻሌንጅ ካፕ) ትሻርክ ለህሌት እግል ሰልፍ ኢነታ ቲ። እት ኡጋንዳ ካምፓላ ጅግራታቲ ወዴ ለአሰመነ ሕሩይ ፈሪቅ ሸባን ኤረትርዮ፡ እት ናይ ተሰፍያት ናይ ደንጎበ ትልህያሁ ምስል ሶማል 0-0 ሰበት ትፈናተ፡ ደርብ ፈሪቅ ኡጋንዳ እት ናይ ሰር-ነሃየት ጅግራታት ህለዮቲ እድመን ህለ።

ፈሪቅን ምስል ሶማልየ እት ናይ ሰር ነሃየት እግል ልብጽሕ እበ አርአወ ትልህየ ሰኔት፡ እብ በቃዐት ሀደፎም ክም በጽሐው መደርብለ ፈሪቅ አሰይድ አለምሰገድ ኤፍሬም ወደሐ። ሕሩይ ፈሪቅ ኤረትርዮ፡ ምስል ኬንያ እግል ልተልሄ መዳሊቲ ክም አትመመ ለሐበረ አሰይድ አለምሰገድ፡ እብ ደማነት አሰክለ ትልህየ ማሌ አተሉት ሄረረ እቦም።

ፈሪቅ ሬድሲ ካመልሰ (ኤረትርዮ) ማሌ እግል ገዚፍ ፈሪቅ ኬንያ 4-1 እንዴ ቀልበ እት ልገት በሐር ሸርበዩ። ዲብ ታሪኩ እግል ሰልፍ ኢነት ህዩ ዲብ ሲካፈ ካሰ ነሃየት ባጽሕ ህለ።

ሕሩይ ፈሪቅ ሸባብ ኤረትርዮ ኢሐምቀ። እት ሚዳን ሰታር-ታይምስ እግል ደርብ ኡጋንዳ እት አፍሪቀ እብ ሰልፋይት ደረጀት

ሴካፋ ለትዋሌ ዐለት ወደዓም ካሰ ሴካፋ ለትሆገለት ኬንያ፡ ሳዐት ሐቲ አድህር ትዋጀህው። ሕሩይ ፈሪቅን ቀደም ዕርፍ እት 19ይት ደቂቀት እብ ሮቤል ኪዳኔ (ዒተይ) እግል መዳፊዕ ኬንያ አሰካር ዋማልዋ እንዴ አሸወጠየ፡ ኬንያ እግል ዕርፍ እብ ጎል ኖሶም እት ልትሚጨው 1-0 ፈግረው።

ሐቐ ዕርፍመ ፈሪቅን እብ አቤል ሰለሙን ወሚካኤል ሀብቲ ሰለሰ ጎል እንዴ አትዐረው ቶም ለቀልበው። አሰካር ዋማልዋ እግል ፈሪቁ ሐቐ ዕርፍ ጎል ኡቱይ እሎም ምንመ ዐለ፡ ሰለሰ ቅያር መተልሂት ምንመ በደለው፡ ኬንያ እግል ልትዐወቶ ኢደቅበው፡ እግል ጀሬ እቲ ለዐለ ህጁማት እት ዳፌሑ፡ እት 49 ደቂቀት፡ እት 66 ደቂቀት ወእት 75 ደቂቀት ሮቤል ኪዳኔ (ካልኣይ ጎል እግል ርሐ ወእግል ፈሪቁ ራብዓይ ጎል ሰበት ሰጀሉ፡ ፈሪቅ ኤረትርዮ 4-1 እግል ፈሪቅ ኬንያ ሰርሐ ህለ።

እት መጅመ-ዐት ሐቲ እግል ብሩንዲ ለአሰከረ ፈሪቅ፡ እብ መትሐድራይት ኡጋንዳ ምንመ ልትቀለብ፡ እት ጅቡቲ ሰበት ተዐወተ፡ ምስል ሶማልየ ሰበት ተዓደሉ፡ ወአዚ ኬንያ ሰበት አጅገሐ፡ አሰክለ እለ ዐሰር ንቅጠት እንዴ ሐየበ እት ነሃየት ዕዱይ



ህለ። ለጅግራታት መሬሕ ለሀለ ፈሪቅ ውላድ ኡጋንዳ 12 ንቅጠት ህለየ እግሉ። ሰበት እሊ ለመጸእ ትልህየ ሬድሲ ካመልሰ ምስል ፈሪቅ መትሐድራይት ሴካፈ 2019 ላት ኡጋንዳ እግል ልግበእ ቲ።

እሊ ክእነ እት ህለ፡ እት ምተሐት 17 ሰነት ጅግራታት ሴካፋ ሻርክ ለሀለ ሕሩይ ፈሪቅ አዋልድ ኤረትርዮ፡ ማሌ-ለሀ ምስል ታንጃኒካ ፈሪቅ አዋልድ ጅቡቲ እንዴ ተልሀ 4-0 ቃልብ ህለ። እትሊ ትልህየ ምስጋና መሓሪ ሰለሰ ጎል (ሃትሪክ) ትሰጀል እት ህሌት፡ ለራብዓይ ጎል ለአቲት ህዩ ሐበን ጎይትኦም ቲ።

ፕሪሚርሊግ እት 17ይት ሳምንቱ

ለድቁብ ፍረቅ አርበ እት ሐልፈ ሰነብት ጅግራታቲ እትሉሉይ ዐለ። እብ አሳሰለ ትረክበት ነቲጀት ህዩ ዌስትሃም እግል ሳውዛምፕቶን 1-0፡ ቶተንሃም እግል ምልቭስ 2-1፡ ማንቼስተርሲቲ እግል አርሰናል 3-0፡ ሊቨርፑል እግል ዋትፎርድ 2-0፡ ቦርንግሚንግ እግል ቼልሲ 1-0፡ ቪፍፍናይትድ እግል አስቶንቪለ 2-0፡ በርንሊይ እግል ኒውካሰል 1-0 ቀሉሶም እት ህለው፡ ብራይቶን ወክሪስታል-

ፓላስ ማንቼስተር-ዩናይትድ ወክሸርቶን፡ ክምሰልሁመ ሌሴስተርሲቲ ወፍርዊች አክል-ሕድ 1-1 ፈግረው።

ወእብሊ ለሰልፋያም ሐምስ ፍረቅ ፕሪሚርሊግ እብ ንቃዋ ክእነ ርቱሞ ህለው፡-

1. ሊቨርፑል = 49 ንቅጠት
2. ሌሴስተርሲቲ = 39 ንቅጠት
3. ንቼስተርሲቲ = 35 ንቅጠት
4. ቼልሲ = 29 ንቅጠት
5. ቶተንሃም = 26 ንቅጠት



ዱባይ ምስል አወላያት ለልሰሕበ መደይን ትረተበት



መደነት ዱባይ እግል ቤጽሐት ምን ልሰሕበ 10 አወላያት መደይን ዐለም እንዴ ገብአት ቀደም ኒውዮርክ፣ ኳላ-ላምፑር፣ ደልሂ ወኢስታንቡል ክም ትረተበት ዓማታት ሐበረው።

እት ምግባይ ምፍጋር ጸሓይ ምን ለህለዩ መዳይን ለበዝሐው ቤጽሐት ወጠን ለትሰሕብ ክምተ ለወደሐ ተቃሪር፡ ዮም ዓመት ሌጠ 16 ሚልዮን ቤጽሓይ/ት ክም ትከበተት አፍሀመ።

ዩሮ ሞኒተር ለትብህል እት መዳይን ዐለም ድራሳት ለትወዴ መአሰሰት ምን 400 መዳይን ዐለም እበ ጀምዐቱ ተቃሪር፡ ዱባይ ምን ውቁላት 10 ለልሰሕበ መዳይን እንዴ ገአት ክም ረክበተ

ተአመረ።

እት ምግባይ ምፍጋር ጸሓይ ምን ለህለዩ መዳይን ወለዐል ዱባይ ጋሽ እግል ትሰሕብ ለአቅደረዩ አግደ ሰቡብ፣ ከፊፍ ወቀዋኒን ለይኢበዝሐዩ ናይ ሺዘት አትመቃርሐት ሰፊር ክምቱ ለተቃሪር ወዴሕ።

እት ረአስ እሊመ፡ ዱባይ እንዴ ኬደው አስክ ብዕድ ድወል እግለ ለሐልፎ (ናይ ትራንዚት) ሰብ ሰፊር ክልኤ ዮም እግል ለአጽንሐም ለልአቀድር ናይ ሺዘት እጃዘት ሰበት ልትሀዩም፡ ቤጽሐት እት መደነት እግል ልእተው ክም ልሰጅዮ ልትአመር።

እማራት እምበል መደነት ዱባይ፡ ሰፊር ቤጽሐት እት አቡደቢ ወራስ አልኸይመ ለከድም ናይ ተሰሪሕ

አሽቃል ናሽረት ክም ህሌትመ ዓማታት ለሐብሮ።


እብ አሳሰለ ድራሳት፡ ምስል እዳረት ቻይን ለትትዐለብ መደነት ሆንግኮንግ እበ ናይ ሰነት ብዝሐ ቤጽሐት አወላይት ደረጃት ጸብጠት ህሌት። እት ለሐልፊት ሰነት ሌጠ ሐድ 29.2 ሚልዮን አንፋር አስክ ሆንግኮንግ ክም በጽሐው እመር ሀለ። ናይ ታይላንድ ዓሲመት ባንግኮክ ህይ 24.1 ሚልዮን አንፋር ክም ትከበተት ለተቃሪር ለአፍህም። አስክ ታይላንድ ለሳፍሮ ለበዝሐው ኤሮብዩን ምንለ ቅርሲስ ዐዶታቶም እት ለሀርቦ እት ግንራራብ በሐር ለህሌት ጸሓይ እግል ልትዘበጦ ክምሰልቱ ተአመረ።

ልብ ወደም

ልብእብ አሰዕድ ለትከውንንኡሽ ደም ለገልል ሞሩምበት ለመሰል ክፈል ገሮብናቱ። ክመ መኪነት እምበል መቶር ለኢትትሐረክ፡ ኣደሚ ከማን እምበል ልብ እግል ልንበር ኢቀድር። ልብ ግዝፋ አክል ክብት-እዴን በጹሕ። እት ክሉ ጅሰምን ህይ ደም ገልል።

ደም አስክ ሸንብእ እብ ኣርተሪታት ለልትበህል አሰራር ደምቱ ለበጹሕ። እሊ ኣርተሪታት ዲብ ቀዋን እት ገይስ ካፒላሪታት (ቀጢን አሰራር ደም) ለልትበህል ሰም እት ደንገበ ትትሀዩ። እሊ ምን ጭገረት ረአስ ለኢዘይድ ቀጣይን አሰራር ደም፡ ለሐቀት ነበረ ምስል አክሰጅን እንዴ ረፍዐ እት ካምል ገሮብን ለአበጽሕ።

ብዕድ አሰራር ደም ህይ እግለ



ገሮብን ለትነፈዳቡ ህወ (ካርቦን ዳይኦክሳይድ) ምን ካምል ገሮብን እንዴ ረፍዐ አስክ ልብ ወሽንበአት እንዴ ጌሰ ክም ልትናደፍ ወድዩ። ደም እት ገሮብን እት አምዕል ሐድ 2000 ኢነት ልትደዋወር።

ልብ እት ክልኤ ልትከፈል፡ ክል ምኑ ህይ ለዓል ወተሓት መግበር እንዴ ትበህለ እት ክልኤ ልትከፈል። ለለዓል ክፋል መክእለሊ ልትበህል። እሊ መክእለሊ ደም ምን ዐባዩ ሸይናት ለልትበህል አሰራር ደም ልትከበት። እሊ መክእለሊ ዶል ልትጨቀም ደም አስክ ተሓት ክፋል ልብ - ኔድኣይ ለኣቱ። እሊ ኔድኣት ዶል ልትጨቀም ደም አስክ ዐባዩ ኣርተሪታት ገይሱ። ድማናይ ኔድኣይ ደም አስክ ሸንበአት ክም ልጨንገዕ ወዴ። ለድገለባይ ኔድኣይ አው መወዘዓይ ደም አስክ ካምል ገሮብ ትነድኣ።

ለምን ልብ አስክ ካምል ገሮብን ለልትነጠፍ ደም እብ ለትፈናተ አሰራር ደም እንዴ ሐልፈ እት ክል 90 ሳንዩት እግል ገሮብን ደውሩ። ደም እት ገሮብን ልትሐረክ እት ህሉ፡ ምን ሸንበአት አክሰጅን እንዴ ረፍዐ ገይሱ። እሊ አክሰጅን ለቡ ዳምቅ ሕብር

ቀይሕ ደም እት ልብ በልሱ። ምን ልብ ህይ ደም እብ ኣርተሪታት እት ካምል ጅሰምን ለአበጽሕ። እሊ ኣርተሪታት እሊ እተ ለቀዋን አሰራር ደም ልትሐበር። ህቱ ህይ ካፒላሪታት እት ልትበህል ለነእሽ አሰራር ደም ነሰኣ። እሊ ካፒላሪታት ለልትበህል አሰራር ደም ነዲፍ አክሰጅን እት ክሉ ሴላት ገሮብን ለአበጽሕ። ምን ለአብጽሐ እት አካን ህይ ካርቦን ዳይኦክሳይድ ውበዕድ ርስሐት ነሰኣ። ደም ምን ካምል ገሮብን እት ልብ ለለኢቃብል እቡ አሰራር ደም ሸይናት እንዴ ትበህለ ልትሰሚ።

ገሌ ሐቃይቅ እብ ሰበት ልብ፦

- ልብ ግዝፋ አክል ክብት እዴና ቱ።
- ልብክ እት ክል ምዕል ቅያስ 115,000 ኢነት ዘብዮ።
- ልብክ ቅያስ 2,000 ጂሉን ደም እት ክል-ምዕል ወዘዕ ወሸዋፍ።
- ንዛም ከሀረበት ገሮብካ ቱ ሆንደገት ልብክ ለራቅብ።
- ልብ ምን ገሮብ ጭሩም-ክሩም ምን ለህሌመ ሆንደገቱ ኢለአበዋር (እግል ገሌ ደቃይቅ)።

መዐሰላመ ሰንያም

2^ይ ክፈል

ደበት-ጋድር ወዮብለት ወአብር ጀዲድ አቅበለ ብፊላት ወግልቡብ ለአሩድ ሰብኡ ሐለለ ገለብ-ሰግለ ወድልክ ሰብኡ ሐርሰ ወአቅበለ አቡተከሰ ወጅልሓዋ ሞዳይ ሰኒ አበረ ቡቲክ ወፍግረት ናባይት ሰወላብክ ቃበረ አግወሕ ቢሽ ካይድ ቱ ህዱደ ወለ ዔደረ ጠርቦ ሐመልማል ብልቱብ አሕድ ዋቀረ ሰወድ-ርስሐት ወሊባይ እብ ተባራት ትገለለ መብረክ ጸዕደ ወድሐሪ ክላይ ልመት አፍገረ ገርህት ተከል ወሐጊት በርቅ ለበቅር ትቃበለ ሐቤላይ ብፊረ ፍትዱቅ ወጭለ ዲቡ ከወዕለ ላጦይ እበ ለዋዉ እንዴ ትማልኦ ካተረ እትግንድዔተት ወቅርቃፍ እደርቦታት ተሓፈረ ተርህ ቤተ ቀወሬዕ ወሃር ወደ ለዕደረ ግድም ለብሰ አፍሓሬን ዐርሽ ጀዲድ አቅበለ ክ'መ እተ ቀዳሙ ሰብኡ ደክረ ወተልህ።

ምን ፊሉጀ ወበቅዳድ ዮም'መ ለረሱብ ካተረ ተርህ ቤተ ለናዊ ምን ሸማል አቅበለ ቡሩክ በልሰ መቀዳም ጊማይ ረአሱ ሸርሸረ ምን ረአስ ጋዊ ወድርዔብ ዐይድብ ወሰጋድ ተቅደረ ፎጌ እንዴ ሐረት ቱ ሸረፍ ቤለ ከአድረረ ሰብኡ ሰፊር ካልኡቱ ወዐረባቱ ትግጠረ ትሰባሰበት እት ረአሱ ወግፊዕ ባልሰት ለዐስተረ አትመሳሳል ኢኮን ወዝላም አርድ ትቃጠረ ሸለክ ምን አካን ቀይም በኪት ወአድሐረ በዐልዬ ሐሊም ወከሪምቱ ምን ጁዱ አንዝለ ረቢ ልርሕሙ ለገብር ሐቆ አሰበረ ምን ረአስ ቢሽ ወአቢዐት አቅበለቱ ለዐስተረ ለቤች ትቤ ወሄረረት ዮም'መ እበ አሰረ ምን ቡሪታይ ወሸብዓለ ክልኣት ለግድም ተዓረረ ዋልዳይ ተምን 'ግል ወልዱ ደለ እሉ ትዋለለ ምርክ ናግፍ ወሳይዱ ሰብኡ እግር በደለ ምን ሰማን እት ሰማን ድባላቱ ተአሰረ ኢቃዩደ ዲብ ገበይ ሰብ አማኑ ናሽለ።

ትተላሌ....
ፋይድ ወድ ሳልም

ምን ልውሐድ ሐምሰ ፍንቲት ሕዘው

